

四庫全書

史部

欽定四庫全書

史部

浙江通志卷一百八十一

詳校官給事中臣戴璐

檢討臣德生覆勘

總校官編修臣倉聖脉

校對官中書臣吳甸華

謄錄監生臣陸維新

欽定四庫全書

浙江通志卷一百八十

人物

六

文苑

三

寧波府

三國吳

任奕

會稽典錄山陰朱育曰文章之士立言繁盛則有御史中丞白章任奕各馳文檄畢若春榮

五代

林鼎

十國春秋字煥文本候官人父無隱有詩名寓明州鼎生於明州之大隱村及長謁錢武肅王

王以為觀察押牙尋辟文穆王幕府文穆襲位署鎮海軍掌書記節度判官昂性讜正而強記能書得歐虞筆法中年讀書必連曙所聚圖籍悉手鈔即殘編斷簡亦校讐補綴無所厭倦吳越國建命掌教令尋拜丞相卒諡曰貞獻有吳江應用集二十卷

宋

周鶚

延祐四明志字廉彥鄞人元豐二年進士當官桐城辭不赴曰學優則仕吾向所治科舉耳遂

益究治六籍諸子百氏之說悉著論其本旨乃游頴昌訪其舅范忠宣公純仁過洛見文潞公司馬公咸見器重在京師上書言徐禧永樂之失後知南雄以言邊事忤時相入黨籍即退休於家作四

休堂於西湖十洲之西與弟銖偕隱所為文二十卷人承宣集一卷明天集一卷六甲奇書一卷甥娶胡氏尚書右丞宗愈之女再娶王氏翰林學士覲之女而妹適陳忠肅公瓊蔡京作黨籍碑婦翁甥舅俱入籍後以為盛事

王璧

嘉靖寧波府志字子潤鄞人宣和六年進士少年氣銳以遠大自期悉焚前所為舉子文披閱

羣書醞蓄日富舉筆為文波瀾湧朝走方復博學宏詞科首魁其選未幾卒士論惜之

高文虎

宋史本傳字炳如四明人紹興庚辰進士調吳興簿曾幾守官在吳文虎從之遊故間見

博洽多識典故遭太學博士孝宗幸兩學祭酒林光朝訪文虎具儀注文虎輯國朝以來故事授之兼國史院編修官與修四朝國史高宗實錄神宗玉牒自熙寧以來史事有非人無所取信文虎盡

取朱墨本刊正謬妄一一研覈既奏御又修徽宗玉牒考訂宣和崇觀以來尤為詳審歷遷中書舍人兼直學士院西掖詞命舊率以數人共一詞文虎乃人各為之選兵部侍郎拜翰林學士兼華文閣學士知建寧府丐祠以臺臣言奪職卒

樓昉

延祐四明志字暘叔與弟昞俱以文名少從呂成公於婺其文汪洋浩博宜於議論援引叙說

小能使之大而統宗據要風止水靜泊然不能以窺其涘故其從學者凡數百人最顯者鄭清之應傑鄭次中趙與惟輩尤善章表李壁黃裳為侍從所為文俱出昉手嘗編歷代文章為一編業進士者咸誦之守興化軍卒

王宗道

嘉靖寧波府志字與文奉化人嗜古學窮渺討幽時出奇見人多稱之登嘉定元年進士

為江東提刑司幹官著有易說指圖二禮說書說
觀頤悟言讀詩臆說雜錄聞見因筆淮鹽論並詩

文五
十卷

應

係宋史本傳字之道慶元府昌國人刻志於學嘉
定十六年試南省第一遂舉進士為教授遷太

學博士秘書郎請早建太子帝問藏書縣請訪先
儒解經注史因及程迥張根所著書皆有益世教
帝善之遷著作郎歷國史編修實錄檢討知台州
召直學士院一夕召辭草麻夜四鼓五制皆就帝
奇其才進翰林學士兼中書
舍人拜叅知政事乞歸田里

王應鳳

成化四明郡志字仲儀鄞人與兄應麟麗講
屹屹忘寢食劇心文圃根柢左氏班馬登文

天祥榜進士寶祐間廷對披腹盡言中甲科第九
賜第或謂曰此麗澤先生名第也盡以異科自見

開慶元年中博學宏詞科歷淮西制置司叅議官未幾文天祥薦其學宜在翰墨之選除太常博士以終所著有默齋稿及

訂正三輔黃圖諸書

薛寘

兩浙名賢錄守持志昌國人少有文名及長以聖人執權賦領鄉薦調衡陽簿時寇起黑風洞

撥寘往撫諭將至有道其姓名者其酋曰非四明作聖人執權賦之薛寘耶遂投戈而退

姚夢午

嘉靖寧波府志字正子慈溪人七歲學小戴禮輒能言其要領邑大夫葉汝明面試中脩

首章義及牧愛堂詩秋水出芙蓉賦皆援筆立就葉大驚異乃大書神童家三字以旌之既而之中都偏交當世之士讀所未見書筆力益肆年三十六始發解未五十連年黃震誅之曰正子起自童卯而長老先進折節相下起一介布衣而當世知名士聞風願交乃不獲少見於世惜哉

元

姚登孫

嘉靖寧波府志字廷禮慈溪人與兄夢午皆英銳早發人稱二難景定間舉鄉貢會宗運

將訖遂退居雙峯別墅窮究經史百氏為文淵奧宏博超絕蹊逕闕古作者之域元時起為國子助

教諸生辨疑曾徵立館下者日數百人發部舉蒙無不意滿趙郡蘇天爵嘗取其文編入文類

戴表元

元史本傳字帥初慶元奉化州人七歲能古詩文多奇語稍長從里師習詞賦輒棄不肯

為咸淳中進士乙科大德八年拜信州教授調婺州以疾辭初表元憫宋季文章氣萎薄而詞韻酸

慨然以振起斯文為己任時王應麟舒岳祥並以文學師表一代表元皆從受業焉故其學博而肆

其文清深雅潔化陳腐為神奇蓄而後發間事摹畫而隅角不用至元大德間東南以文軍大家名

重一時者惟表元而已其門人最知名者曰袁桷

袁桷

元史本傳字伯長慶元鄞人舉茂才異等大德初為翰林國史院檢閱官時初建南郊桷進十

議禮官推其博多采用之陞應奉翰林文字同知制誥兼國史編修官請購求宋遼金三史遺書累官翰林直學士知制誥同修國史至治元年遣侍講學士秦定初辭歸桷在詞林朝廷制策勲臣碑銘多出其手所著有易說春秋說清容居士集

董復禮

黃潛董復禮墓志字秉彛奉化州人少嗜書不以貧輟其學故衣敗絮無以禦寒麻被俠

策坐竟日莫見有不堪之色嘗為舉子業試有司不列遂不復踐場屋益取經史百氏之言鉤微槩隱而求極其根柢間出為歌詩雜文皆清麗古雅可喜侍講學士袁公桷甚器重之

黃玠

弘治湖州府志字伯成慈溪人震曾孫清苦力學無所不通周游西湖樂吳興山水因卜居弁

山與趙文敏遊文敏稱許之有卞山集知非稿唐詩選纂韻錄等書行世

鄭芳叔

嘉靖寧波府志字德仲鄞人宋亡遊遺老之門博學廣記家貧無書嘗假人書躬自繕

錄積數十百卷為文一恨於理不事浮靡從游嘗數十人兩任郡學訓敦厚嚴重以道自尊而尤篤於倫理晚署學錄未上卒

顧潤

嘉靖寧波府志字德輝鄞人大父應春父叔川皆以文名潤六歲即善屬文郡博士俞希器欲

以神童舉不果既長肆力經傳卓然欲以事功自見閉門卻掃然索精思垂三十年著釋圖一說約六十三圖徵二十一布言二十四事刻六十二治要十八體卦八解八辨十二議二十四傳七記論

序文銘各三雜著十八賦驗十
九雜詩三百二十合三十卷

王厚孫

嘉靖寧波府志字叔載尚書應麟孫十歲能詩賦操筆立就父昌世入元弗仕遊其門者

多老成博雅之士厚孫日侍左右而命心傳充積淹博金華黃潛薦司郡訓導為郡直學秩滿授象山教諭調浦江解歸自號遂初老人性介潔為文法三代兩漢不事雕飾有遂初集三十卷

姚應鳳

兩浙名賢錄字時和慈溪人以才自雄為文喜馳騁每屬筆於廣衆中詞鋒橫逸一座皆

驚後持以謁袁桷桷告之曰子文不受束縛然法度不可廢也額之自是務為莊重簡嚴日益深邃至元間就試省部以龍虎臺命題有司得應鳳賦歎曰此楚漢故物也擢置高第著有納軒稿若干卷

陳子翬

成化四明郡志字象賢奉化人負氣幹精文藝書法李邕為慶元路教諭後歸日與高橋

章壘甬東鄭奕夫剡源徐本原相問難經生學士爭受業焉每風晨月夕載酒溪山更唱迭和以發

抒懷抱著
有思剡集

袁上元

元詩選傳字彥章鄞人德祐忠臣鏞之孫性至孝父背患疽吮之立愈以茂才授縣學教

諭調鄞山書院山長尋為平江路學教授推翰林國史院檢閱官不赴築城西別墅種菊數百本自號菊村學者所著林外集七卷危太僕為之序稱其思致高遠云

文質

元詩選傳字學古甬東人居吳之婁江學行卓然詞章奇放好為長吉體酒酣長歌聲若金石

為揚鐵崖所稱
年九十六卒

陳鏗

嘉靖寧波府志字子經奉化人官至翰林學士
祖著宋時知台州嘗木綱目撰書以紀歷代之

統鏗自束髮受書即思弘前業乃續成二百卷上
自盤古逮高辛訖於有宋比事較義紀年師司馬

公補遺書法師朱文公綱
目名曰通鑑續編行於世

明

烏斯道

靜志居詩話字繼善慈谿人明初以薦起知
石龍縣調永新以疾去官與兄本良字性善

並著才名鄉人目性善為春風先生繼善為春草
先生宋濂稱其文云俊潔如明月珠洵湧如春江

濤揚子器稱其詩云竦秀若雨後春山
綺麗若雲中翠嶽有秋吟稿春草齋集

崔植

成化四明郡志字斯立鄞人治春秋辨論三傳
得失歷歷如指掌究極羣史出入班馬范歐叩

之淵乎無畔岸平居儀度整肅不假修飾而規範自然洪武七年薦為郡學教授調處州教授後進盡出底蘊隨其才而成就之卒官有雜著文集若干卷

王賓

嘉靖寧波府志字用賓鄞人博學強記貫穿經史百家避地村疇淡然自遠號水村隱者洪武

中以文學薦授休寧教諭以身率諸生士不慙而自勸秩滿考績廷試鍾山雨霖賦及泰鶴賦上奇之命供奉翰林以老辭教授浮州卒門人私謚曰清節先生所著有書隱西上南游等集

余伯熊

天啟慈谿縣志名夢祥以字行性落落不與流俗伍家貧好學寒暑不懈以詞翰聞於時

洪武十六年舉明經授宜都知縣調饒州之安仁所至有聲

胡廣

成化四明郡志字文剛鄞人從鄉先生胡世佐授毛詩討論校讐問學淵博敦行誼造紛華為

文冲淡純雅工律詩文士過從無虛日洪武中司訓邑庠後調四川之安岳縣歸里優游山水寓物

寫意自謂乾坤腐儒所著有雲屋集

時銘

嘉靖寧波府志字季照以字行慈谿人好學能詩漁獵經史為文奇正間出變化不窮洪武二

十九年為鄞學訓導已而赴京和御製思得人詩上樊諭召對特授監察御史未幾為崇仁令有政

績歷陞四川按察僉事嘗夢蒼顏縞衣人授以墨文思益進因號所著詩文為夢墨稿行於世

王毓

嘉靖寧波府志字用賢鄞人貌清癯讀書以古

去因寄之模寫標格勁瘦天機呈露賦詩尤工於長歌隸書亦有新意時稱三絕

周陞

天啟慈谿縣志字孟簑居市廛一室如舟所儲書史之外無他物因號書舫齋為詩歌音調高

古不類今人每遇酒酣擊節歌
陶淵明詩四顧慷慨旁若無人

錢珣

嘉靖寧波府志慈谿人不慕榮利雖獨處安室
不廢冠履容止瞻望未嘗傾側遇天日清美輒

游里閉閤步履有循儀觀整肅不問皆知為溪雲
先生也性好吟咏口吃若不能言為詩清麗雄渾
得少陵家法有和唐
音并溪雲稿行世

鄭復言

鄭雍言

嘉靖寧波府志復言鄞人永樂丙戌進士選庶吉士讀中秘書鈞纂

精微預修永樂大典應制賦白鹿稱旨改禮部主
事歷陞太僕少卿引年歸弟雍言舉進士改庶吉
士授中書舍人仁宗監國屢命賦詩頃刻立就尋
命署禮部尚寶司及六科事上嘉曰不獨文詞典
雅作字亦端楷嚴密甚類其為人陞河南按察僉
事宣宗御極留直文華殿日備顧問終太常少卿

桂宗儒

天啟慈谿縣志字文數以貢與修永樂大典授蘄州同知有善政不能迎合監司遂注下

考吏部侍郎師達以善詩工書薦召見拜修撰居職七年每應制有作為時所稱

桂瓊

嘉靖寧波府志字懷英慈谿人倜儻不羣至老不釋卷詩文克牧士大夫及門請益者無虛日

相語不以名氏尊之曰古香先生所著有桑榆稿

劉本

天啟慈谿縣志字維源永樂丙戌進士先是成祖選會榮諸人肄業文淵閣上時至閣中或召

至便殿搜奇書辭事以驗所學於時榜選十一人本與馬同修永樂大典校讐文淵閣一日忤旨發口外為民尋召還為編修以疾卒

馮厚

嘉靖寧波府志字良載慈谿人生三月而孤比長事母至孝舉明經授學官厯遷淮王府長史

嘗集文翰類選大成凡一百六十三卷以資啟沃
善詩文多著述有洪菴稿中都稿南陽稿測蠡管
見春秋卑
論等書

周翰

嘉靖寧波府志字維翰鄞人永樂三年舉人車
駕臨太學翰獻賦稱旨詔禮部覆試推第一命

進學翰林預修永樂大典七年除翰林典稽先是
文淵閣所儲古今書籍歲久卷帙淆亂翰為理葺
餘二載秩然完整各書要旨略能記憶陞檢討修
兩朝寶錄書垂成而卒翰為文根柢班揚出入韓
柳下筆頃刻千
言有集藏於家

葉銘臻

兩浙名賢錄字維新慈谿人永樂甲申進士
以文名詩有盛唐風格每為舉主解縉所稱

韓王請為伴讀王改國於涼遂歸鄭瑤來守郡造
廬求見堅謝不出瑤曰來求作府堂記耳何拒之

深也乃出見惟如平生延至郡齋援筆為記路歎服居家動遵禮法不戚而肅士大夫語家法之善者以銘
錄稱首

顧慤

嘉靖寧波府志字存誠司諫道之子少聰警於書無所不讀仁宗念司諫舊德詔起之挾裝上

京師進謁藩臣不與均禮意其中未必有也指所坐聽事曰堂名紫薇請記之趣具楮墨慤展紙濡毫頃刻立就丈不更草書體數家俱備乃歎曰奇才也以上客禮之陛見推司經正字性亢直不能隨時俯仰忌者劾之謫戍南丹在戍發為詩歌沈鬱頓挫得柳柳州風致卒年二十九有克然子集魏偁嘉靖寧波府志字達卿慈谿人由貢上春官廷試第一授石城訓導為詩希唐風恒以立言自許時與學士楊守陞相唱和守陞甚器重之平生不見疾言遽色至利誘誘懷則叱然山立不可動

所著有經書僅悟穀亢子茶餘詩話
聞見類纂小史雲松詩略讀史編

洪常

甬上耆舊傳字子經鄞人博學強記家貧嘗從人借書一覽便盡中進士授兵部主事會土木

之變于謙進尚書一時軍事勢錯盡以相屬謙每入朝常輒具筆札以從事至且語且疏即不具草立上稍違至郎中英宗復辟吏指常為謙黨上特原之後馬昂為尚書值西陲多事昂常而陳部曹乏人上顧問洪常安在以憂去對即令起復至部久之疏薦常為本部侍郎忌者劾昂私所屬常遂請疾歸里蕭然一室以文章自命晚年得所未見書必手鈔之所著有勉學錄石田稿隨筆考文業

考及選定

六家文集

張琦

嘉靖寧波府志字廷珍慈谿人讀書一過不忘作文有俊才正統辛酉中鄉試時猶未冠也試

禮部不利益自奮於學文氣浩瀚如峽江春流不可抵禦時海鹽張寧餘姚魏瀚嘉興姚綬俱有名於時人稱浙江四子
天順登第未幾卒

王淮

列朝詩集傳字柏原慈谿人景泰十子之一長身美髯博極羣書嘗與湯公讓過於吳興之慈

感寺以辨博相夸對語移日不相下及徵青陵臺事各得其二淮問公讓曰止於此乎復舉其一厯厯口誦無所遺公讓歎服語太守岳璿曰柏原真行秘書也好作長歌下筆輒數十韻造語奇麗擅名江湖間卒年八十著有太媿藁

羅信佳

兩浙名賢錄字邦彥慈谿人嘗與同邑桂琛鄭岑馮璋時中讀書永明僧舍四人讀窮晝

夜一燈聚首每至夜分信佳獨鼾睡達旦及舉所讀背誦如流水至講解經傳四人紛拏未定信佳

卧其旁徐以一言決之景泰庚午與四人同領鄉薦大理丞夏時正題其讀書處曰聚奎堂為文記之成化丙戌登進士除南兵部主事未幾卒信佳文字簡嚴人謂似李泰伯

王暘

天啟慈谿縣志字時暉風韻凝遠讀書不務章句搜剔幽微至闕彙倫世故必反覆詳至務趨

深厚為文於閒肆中出奇怪恥作軟媚語正統丁卯舉鄉試五上春官不利乃作五葵賦以見志時

宰以其上楷法薦授中書命下而卒

張琦

列朝詩集傳字君玉鄞人弱冠游學吳楚間每讀書至夜分與其徒吸水喫面醒則又讀弘治

戊午舉於鄉明年第進士年已及艾授南大理評事歷寺正陞興化知府監司累上治狀以疾請歸陞左叅政致仕二十年而卒自少至老刻意攻詩嘔心殫腎力去陳言有白齋集十卷

陳沂

列朝詩集傳字魯南鄞人以醫籍居南京八歲能摹古人畫十歲能詩十二歲作赤寶山賦傳

誦人口中正德丁丑進士改庶吉士授編修進侍講忤張字敬出為江西叅議山東叅政轉行太僕卿致仕杜門著書絕意世務書學大蘇旁及篆隸繪事皆稱能品所至好遊名山水皆有詩紀晚與顧華玉遊歷長干諸寺賦詠尤多文采照映一時有拘虛詩集及詩話若干卷

章珍

自上海傳字文重鄞人自天順成化以來與張景心宋弘之李櫟軒俱以布衣宿望為里中

五經師書法仿宋克詩溯漢魏能造其妙生平喜讀易有易注若干卷又孤舟夜讀一卷他所著句

章小篆言

二十卷

洪貫

嘉靖寧波府志字維卿鄞人舉成化丁酉鄉試除鄞州教諭肆力為古文詞詩通盛唐賦有楚

漢風格陞知崇化縣政政和邑有紫陽西山遺跡
貫因表章發揮以經學風厲多士彬彬起然竟
得下考以歸因擬杜秋興詩見志傳至京師李東
陽大加賞異別為春興八首以遙和之晚結廬東
野更號稼翁日哦其間取唐人詩和之殆偏或丐
銘誌譜牒以為時重海寧新城江陰靖江四邑志
皆其論撰也年九十卒有周易解疑
卧遊清嘯錄太白山人藁五十餘卷

金湜

甬上耆舊傳字本清鄞人童時輒能詩長益漁
獵載籍舉於鄉以善書授中書舍人遷太僕寺

丞督山東河南馬政宣詔朝鮮其國尚文學聞湜
有詩名請留詞翰為即席草答數十首文義溢發
自壬以下盡驚曰前此所未有也因請其使節所
歷詩文錫諸國中名曰皇華集使還致仕家居與
里中耆舊觴詠為樂詩多逸韻篆隸行草俱有漢
晉人風骨善寫竹每命筆姿態橫生率題小詩於

上

吳惠

嘉靖寧波府志字仁甫鄞人少孤習記誦為詞章即越流輩正德辛未成進士改庶吉士授檢

討陞國子司業日會六館生講經書與義人喜得師嘉靖初侍經筵日講歷太常寺卿卒惠自少熟蘇長公文濡毫染翰每相肖李東陽揚一清常以東坡稱之惠亦以此自許或譏其不能進於古惠曰經生學士如好古者且就左氏司馬讀之何暇及我乎其文自成一家言在太學有經筵講義別有北川文集

華愛

嘉靖寧波府志字仁卿鄞人甫成童博聞強識正德甲戌成進士歷南兵部職方郎出守桂林

有勲績以直道忤人被劾落職性溫雅洞見肺腑家居日以詩書自娛興至輒攜其所知夷猶於迴

溪壺嶂間見雲蒸霧變木秀卉榮則欣然忘返工
行草為詩布盛唐風格每以王維杜甫為至所著

有石
聽集

陸鈇

兩浙名賢錄字舉之鄞人正德庚辰進士廷試
第二官編修讀書中秘益銳志問學盡覽經史

百家言尤砥名節以古人自期預修武皇實錄成
進修撰以議禮忤時相遂出為湖廣僉事轉山東
副使督學政敦本抑末士風為之一變山東舊無
通志歎曰海岱山川之宗聖賢人物之望六經文
章之祖惟茲一方之志而天下古今之事備焉吾
當任茲役遂考古畧今補遺正謬窮日夕不懈踰
年志成而病卒鈇為文奧衍宏暢詩則溫而典
婉而諷有晉唐之風著有少石子集十三卷

李端

嘉靖寧波府志字文正鄞人與二弟同龔至老
諸子十人各課耕讀郡太守禮為鄉校師規誨

整肅為詩逼唐人時與金太僕湜倪處士光魏學博傅締為詩社日本貢使還求端詩為贈有肩挑雲影江頭別衣帶天香海上還之句人傳誦之

張鈇

天啟慈谿縣志字子威博綜百家再試場屋不第遂棄去攻詩古文吟口論天下事疊疊竟日

聞人之善雖遠必赴亦有接里閑而不通往來者燕居獨處必正襟危坐高風逸韻傲睨物表所著有碧溪詩集南臯詩話郭外農談詠史百絕等稿

方詔

天啟慈谿縣志邑諸生綜博古今嘗著明四都賦瞻而拔秀而葩走獻闕下相國袁煒其故交

也投謁自居揖客名稱不改其舊袁目為狂客賦不果上東還絕意世事著述益富

應雲鷺

嘉靖寧波府志字瑞伯象山少詣父讀書處見墳典沿博輒曰會須讀盡此書父奇之

長遂刻意淬厲六經子史無不淹貫嘉靖辛丑成進士出令臨川設三條法以清虛課上之巡撫為時成式築文昌堰疏巾金陂議設巡司政績炳著歷陞武庫司郎中時有邊警數議征討防禦之計方欲柄用而卒雲鷺好古文詞凡所撰著悉本六經而步武遑固唐宋以下弗屑也所著有臨川集東塘穀音象川雜藁

張時徹

甬上耆舊傳字維靜鄞人二十舉於鄉成進士歷官南曹郎以副使督學江西備兵臨清

歷官至南兵部尚書遂歸時年齒尚茂既不為世用乃精思撰著為詩古文詞及他說林家言凡數十卷輯洪建以來名文為文範撰郡志續四明風雅既以標格自持益好士家有別墅在東臯曰茂嶼草堂在西臯曰武林莊時引客觴詠其間

陳東

列朝詩集傳字約之鄞人嘉靖己丑進士選庶吉士授編修出為湖廣僉事分司辰沅澧福建

提學副使改河南卒於官年三十三初會稽董侍郎北有愛女不欲與凡兒婚甬東張尚書時徹為言曰陳生雖起寒微其人才足壻也侍郎召見之垂髫散衣膚神玉映叩之無不響應試之詩文揮筆如雲烟侍郎大喜尅日為婚既入中祕與唐順之王慎中諸人刻厲為古學張桂受上殊寵奔走朝士東獨不往恨之出之外藩稍遭視學亦更繁劇再疏求去不得而死唐順之為刻其遺文皇甫汈為序謂為早鏤四傑晚銘二張適軫平原昨駕康樂云

呂時臣

列朝詩集傳字中父鄞人稱詩先於沈明臣避仇遠游歷齊梁燕趙間旅寓章邱與李伯

華論詩遂大進至青州客衡藩衡莊王愛其詩為刻甬東野人稿晚客藩藩禮之亞於謝榛卒於河

南涉縣魯王孫中立序其詩曰山人竊骨清癯若
出衣表貞介廉潔不妄交不苟取特為諸侯所重

戴鯨

甬上耆舊傳字時鳴鄞人以進士知番禺縣歷
南工刑二曹出為江西按察僉事謫判鄧州歷

官福建左叅議歸老於家持操廉白以孝友名垂
老猶好學日坐東白樓手一編不置成化以後郡
志闕然因續為蒐補考諸先輩所言述而不斷名
曰四明志徵又見高士宋弘之所輯四明雅集因
增所未備序而傳之又合為四明文
獻錄別著閩廣集東白樓稿藏於家

沈明臣

列朝詩集傳字嘉則鄞人為博士弟子數奇
不偶胡宗憲督師平倭辟置幕府宗憲留連

好士微有酒失善嬖罵明臣獄獄不少阿宗憲遙
望見為起立嘗燕將士於爛柯山酒酣樂作請為
鏡歌十章明臣援筆立就醺酒高吟至狹巷短兵
相接處殺人如草不聞聲宗憲起將其須曰沈生

何雄快乃爾命刻石置山下宗憲死明臣走哭墓
下時所為誄徧告士大夫訟其寃已而挾英走湖
海往來吳楚閩粵間年七十餘卒先後歌
詩行於世者為豐對樓詩選凡四千餘首

葉太叔

鄭縣志字鄭朗工詩沈明臣見而奇之曰此
今日李王孫也遂與定交以其詩呈張時徹

深為賞異有故人令吳中邀修邑志太叔既為輯
定獨署已名今以百金置酒為壽欲得附名纂撰
太叔哂然曰著書千載事豈容賁取遂束藁而行
其詩草偶有不愜悉付諸火既悔而追錄所記憶

名思
烟集

汪禮約

甬上耆舊傳字長文中丞王之孫石孟山人
坦之子從學沈明臣得其指授由是名益重

所居曰大雷山房人望之若三壺仙宅坐卧一樓
樓左偏開一穴下置容五石缸使人鏈其外每一

詩成輒手取按之投穴中積歲缸滿家人發戶出
紙好事者爭取之稍傳布人間其著作甚多沒後
散失僅存遺詩一卷四明游籍一卷

屠隆

列朝詩集傳字緯真一字長卿鄞人萬厯丁丑
進士除潁上知縣調青浦陞禮部郎中隆令青

浦延按吳越間名士青帝白舫縱浪柳浦間以仙
令自許在郎署益放情詩酒罷歸縱覽關塞遨遊

吳越七閩間嘯傲賦詩長篇短什信心矢口嘗戲
命兩人對案分拈二題各賦百韻咄嗟之間二章

並就又與人對奕口誦詩文此誦彼書書不逮誦
所傳由拳白榆采真南游諸集皆未曾起草之筆

楊承鯤

甬上耆舊傳字伯翼鄞人少喜讀班馬二史
工詩年十五為諸生沈明臣見而奇之曰獬

兒難與爭鋒因呼為德祖以是有重名為人守古
獨行於當世少所許可嘗與人言王弼州論厯下

朗鑒不足歷下持詭道所得者古人匡郭耳既以太學生北上作薊門行名滿京師久之歸里於城南築小園獻詠其中文章高妙詩於五律為長城善法書遺集二種傳於世

余寅

甬上耆舊傳字君房改字僧杲鄞人兒時里師授句讀每為所屈及壯益喜讀秦漢以前書舉

進士官水曹郎上正風俗十事以按察副使視學陝西請謁一無得入遣左叅政改山東以忤時乞歸起福建再乞休加太常少卿致仕寅性伉厲狷然獨行既里居擅文章之事然恥以筆札自見交游甚寡年七十五卒有農丈人集其詩彙而堅質而峭絕似其人顧歆然自謂於詩涉其藩未能窺其奧意專以古文辭上追古人也

董大晟

鄞縣志字揚明傳學工文著海曙樓賦淵泓得體不滯不詭又有雪月風花賦並為世所

稱

李瑋

甬上耆舊傳字偉卿鄞人盡讀五經三史作有韻之文輒得奇語及壯遊薊門逾年歸杜門著

書務期盡洗俗學歸於大雅前後撰著積數十萬言獨留心土風利病嘗著國課論東錢湖賦臚列郡國農田水利事甚詳年踰九十作七適一篇手定詩文十餘卷曰桑麻集謝三賓刻以行世

王萱

天啟慈谿縣志字季儒父交為給事中嘗折權相翟鑾著直聲萱其李子也髫髻時即以詞賦

傾諸作者萬歷癸未舉南宮改庶吉士授編修一時儕偶皆折節下之為文意氣矯厲如驚飈蓬勃洞賦耳目詩如高山大壑峯截曠遠與屠隆相伯仲丙戌持節冊封晉藩報命至潞河卒所著有雲山日記采真編季儒詩選商雲館全集並行於世

應泉

鄞縣志字仲鶴為諸生後棄去汎舟江漢間發為楚聲已而上薊門歷長安落落無所合歸而

卜築於東皋之竹蒼畝與二三隱人往來酬倡信安方應祥徐日久延至爛柯山以詩文師事留都各部寺誌皆泉手裁嘗與閩中曹學佺論文意甚合故石倉詩選泉詩獨多

李竣

甬上耆舊傳字公起鄞人生而聾父尚默卒於官竣甫十餘歲聞訃號痛凡五日夜咽枯而嘶

乃更啞及長盡發先世遺書縱觀之上自國家典故邊場戶口名臣言行無不得其始末以至一器一物靡不考据精覈作為史譜輯甬東逸事幽奇畢顯行世有盟鷗集其未刻者十餘種曹學佺嘗合華亭唐仲言為二異人傳仲言瞽而工詩竣以目誦仲言以耳讀兩君誠千載異人也

王嗣奭

舊浙江通志號于越鄞人領萬厯庚子鄉薦授涪州知州少有文名及長博覽經史尤嗜

少陵詩嘗夢與把臂共吟後之官入蜀過草堂謁少陵遺像恍然夢中遂詮注其詩曰杜臆著有左

右鏡山中天管天諸筆記

薛岡

甬上耆舊傳字十伋鄞人少辟地客長安為新進士代作考館文字每得與選因有盛名所著

天爵堂集身為太平詞客六十年名重天下

汪樞

靜志居詩話字伯機鄞人生世祿之家不樂仕進治別業曰汜園賦園居詩六十首閩人徐興

公亟稱之有存侯篇

董守諭

舊浙江通志字次公鄞人負性耿介不俯同流俗為文章恥循常襲故登天啟甲子賢書

七上公車不第杜門讀易有得即抄之積以成帙性不善治生家本素封用以待賓客賑親故遂致

欽定四庫全書

卷一百八十

日落當事欲一面不可得士論以此重之所著有監蘭集及讀易一抄二抄卦變考略

馮元仲

慈谿縣志字次牧幼即肆力於詩古文鈞深探微試吏部授縣丞歸隱湯山更名天益取

前人未刻書及米趙諸家墨蹟雕鏤猜好又按古名墨法更製之一時天益山書墨遂名天下其後家日落敝衣簪笠行道中與人評論詩文及談黃道周倪元璐諸遺事往往移晷始別去詩法杜而體兼北宋然未嘗留稿僧寮邨店類垣敗壁間存者十一每為人所膾炙

陸符

黃宗義陸符墓誌字文虎寧波人貌甚偉胸貯千卷警欬如洪鐘一時士大夫聽其談論皆以

為陳同甫辛幼安復出也崇禎辛巳以薦至京入國學生壬午順天鄉試丙戌卒年五十符古文詞鵬騫海怒意之所極每穿天心月脇而出詩皆志意所寄市交游而作聲色者未嘗以片語汙其筆

端雖才堪經世而脩然獨有世外之致

劉應期慈谿縣志字瑞當為諸生有盛名初與姜思睿稱姜劉已思睿登第復與馮文偉稱馮劉

一時名士無不願與之交發為詩文辭拙類圭峯家數

國朝

李鄴嗣舊浙江通志號杲堂鄴人自高祖循義至父

人世自竄草石日著書撰漢語南朝語續世說新語為三語而漢語不列曹氏一門其詩古文詞凡

一百餘卷類漢語鄴人宗師之

陳錫嘏鄉賢留祀冊字介眉號怡庭鄴人康熙乙卯領浙解明年成進士改庶吉士授編修與纂

皇輿表鑑古輯覽二書充己未會試同考官尋予告歸寧波府志錫嘏處身若冰雪而與之處輒平易近人為諸生窮日講授矻矻不休官詞臣公堂館課私室橫經率至難鳴而寢里居膺末疾猶隱囊危坐不釋丹鉛士人將卷帙來請必銖兩其得失終卷而後已有集若干卷

鄭梁

寧波府志字禹梅又字寒邨慈谿人康熙戊辰進士授庶吉士改戶部主事歷陞郎中甲戌會

試同考出知高州府時議開硎川梁謂此為鯨鯢出沒導之路也持不可有孔道士者欲嘯聚為亂通揭城中言某日賊且至梁識其手書一訊而伏嘗學於黃宗羲聞戴山劉先生緒論寓意於藝文詩類江門定山丈近震川宗義亟稱之復善畫既歸里旋得末疾右體不隨遂以左筆驅染如平時跌宕文史人目為仙吏云

姜宸英

慈谿縣志字西溟太常卿應麟曾孫工制藝兼善詩古文康熙戊午有修明史之

命相國徐元文以宸英有史才薦入館遂奉特恩授文林郎食七品俸己巳徐司寇乾學即家纂修

一統志設局於洞庭東山疏請宸英與黃虞稷偕行尋中順天鄉試丁丑廷試一甲第三授編修時

年已七十矣宸英讀書以經為根本於注疏窮其精蘊自二十一史及百家諸子之說俱經批閱為

文必先立意而後下筆畧無凝滯書法鍾王於唐宋諸家亦靡不臨寫晚尤加意章草及篆隸人得

片紙藏弄以為寶著明史刑法志三卷列傳四卷土司傳二卷一統志總論江防海防共六卷留館

中別有湛園未定稿十卷葦間詩集八卷行世

周容

寧波府志字鄮山鄞人性跡弛不羈御史徐殿臣一見賞契由是著名後殿臣避跡天童海寇

掠之而去容即倉皇奔赴以身質之殿臣得返而容代受刑梏足為之跛乘間竊歸乃縱橫於詩古文詞尤工書法飲鋒鏑於渾璞中時謂容之詩勝於文書勝於詩云

陳赤衷

黃宗義陳赤衷傳字夔獻以學問非場屋所竟乃入天井山與苦行僧為侶屢淹歲月書

然冰解歸而返求之六經創為講經會搜故家經學之書討論得失往往為先儒所未到康熙庚申以貢入都玉峯徐氏令其子弟稟學焉後卒於京邸

萬斯同

寧波府志字季野鄞人泰第八子生有異質書過目不忘八齡在客座中背誦揚子法言

如倒峽十四五徧讀父所藏書尤精經史從學於黃宗義大司寇徐乾學延請編纂禮書太學士徐元文聘修明史或詢以史事則曰在某卷幾葉幾行如其言閱之無一爽者性不樂榮利見人惟以

讀書勵名節相切劇著
經史學書合三十種

萬言

寧波府志字貞一鄞人少與諸父斯大斯同學
於黃宗義義善古文康熙乙卯副浙榜貢入京師

以教習需次知縣會修明史總裁徐元文特薦七
人言與焉

特授文林郎食七品俸兼修一統志在館
五年多所撰著授江南五河知縣

紹興府

漢

盛憲

嘉泰會稽志字孝章會稽人舉孝廉累遷吳郡
太守以疾去官憲最有名孫策平定吳會深忌

之少府孔融與曹公書曰海內知識零落殆盡惟
會稽盛孝章尚存困於孫氏單子獨立孤危愁苦

孝章實丈夫之雄天下談士依以揚聲公誠能馳一介之使加咫尺之書則孝章可致矣燕君市駿骨以招絕足欲公崇篤斯義由是徵為騎都尉制命未至為策所害

三國吳

謝承

三國志注字偉平博學洽聞嘗所知見終身不忘拜五官郎中武陵太守撰後漢書百有餘卷

朱育

嘉泰會稽志山陰人少好奇字凡所特達依體象類造作異字千名以上仕郡門下書佐與太

守濮陽興問對行於世育後仕朝嘗在臺閣為東觀令加位侍中推刺占射文藝多通

晉

虞預

晉書本傳字叔寧本名茂十二而孤少好學有文章召為丞相行參軍除著作郎遷散騎侍郎

以年老歸預好經史憎疾元虛著晉書四十餘卷
會稽典錄二十篇諸虞傳十二篇皆行於世詩賦
碑誄論難數十篇

王獻之

晉書本傳羲之子字子敬工草隸善丹青七
八歲時學書羲之密從後掣其筆不得曰此

兒當復有
大名嘗書壁為方丈字羲之甚以為能
觀者數百人桓溫使書扇筆悞落因更寫作烏牓
牛甚妙謝安請為長史太元中新建太極殿安欲
使獻之題榜而難言之乃謂曰魏時凌雲殿榜章
仲將懸橙書之獻之揣知其意正色曰有以知
魏德之不長安遂不之偪徵拜中書令卒於官

南北朝

謝靈運

宋書本傳少好學博覽羣書文章之美江左
莫逮襲封康樂郡公世稱謝康樂宋少帝時

出為永嘉太守郡有名山水靈運肆意遊遨所至輒為詩詠以致其意焉父祖葬始寧縣并有故宅及墅遂移籍會稽修營別業傍山帶江盡幽居之美每一詩至都邑貴賤莫不競寫宿昔之間士庶皆徧太祖徵為秘書監尋遣侍中賞遇甚厚靈運詩書皆兼獨絕每文竟手自寫之文帝稱為二寶賜假東歸因父祖之資鑿山浚湖工役無已尋山陟嶺必造幽峻巖嶂千重莫不備盡登躡徙臨川內史在郡遊放為有司所糾徙付廣州

謝惠連

南史本傳年十歲能屬文靈運嘉賞之云每有篇章對惠連輒得佳句嘗於永嘉西堂思

詩竟日不就忽夢惠連即得池塘生春草大以為工嘗云此語有神助非吾語也元嘉七年為彭城王義康參軍義康修城塹中得古塚為之改葬使惠連為祭文留信待成其文甚美又為雪賦以

高麗見奇靈運見其新文每曰張華重生不能易也文章並行於世嘉泰會稽志祖冲父方明三世皆居會稽

孔稚珪

兩浙名賢錄字德璋山陰人少多學涉工文詞時周顒隱鍾山已而復仕稚珪作北山移

文譏之齊高帝召為記室與江淹對掌詞翰歷御史中丞建武初為南郡太守稚珪風韻清疎好文詠飲酒七八斗不樂世務居室盛營山水憑几獨酌旁無雜事門庭之內草萊不翦中有蛙鳴曰我以此當兩部鼓吹邇來子唐事加散騎常侍卒

孔廣 孔逵

南史邱巨源傳會稽孔廣孔逵皆才學知名廣字淹源美容止善吐論王儉嘗

云廣來使人廢簿領不須來則莫聽去張緒數中車詣之歎云孔廣使吾成輕薄祭酒仕至揚

州中從事逌有才藻製東都賦於時才士稱之陳郡謝滌年少時遊會稽還父莊問入東何見見孔逌否見重如此著三吳決錄卒於衛軍東曹掾

虞通之

虞繇

南史邱巨源傳通之繇皆會稽餘姚人通之善言易至步兵校尉繇位中

書郎走尉少好學居貧屋漏恐濕墳典乃舒被覆書書獲全而被大濕時人比之高鳳

虞騫

梁書吳均傳騫會稽人工屬文官至王國侍郎有文集

虞羲

南史王僧孺傳竟陵王子良開西邸招文學僧孺與太學生虞羲並以善詞藻游焉羲字士光

餘姚人咸有才藻

卒於晉安王侍郎

賀文發

南史傾越傳會稽賀文發學兼經史與越名相埒故都下謂之發越

虞綽

隋書本傳字士裕餘姚人博學俊才尤工草隸陳左衛將軍傳綽有盛名見綽詞賦歎曰虞郎

之文無以尚也隋大業初為秘書學士與虞世南庾自直等撰長洲玉鏡等書十餘部綽所筆削帝未嘗不稱善嘗居禁中以文翰侍詔從征遼東帝舍臨海頻見大鳥異之詔綽為銘命有司勒於海上揚元感虛襟禮之綽從之遊元感敗徙綽且末所有詞賦行於世

唐

賀德仁

嘉泰會稽志山陰人與從兄德基皆以文詞稱時人為之語曰德行可師賀德基文質彬彬

彬賀德仁兄弟八人時比漢之荀氏高祖起兵為隱太子友歷官東宮學士貞觀中卒有集二十卷藏於

四庫

孔紹安

舊唐書本傳越州山陰人少與兄紹新俱以文詞知名年十三陳亡入隋徙居京兆鄠縣

閉門讀書誦古文集數千百言外兄虞世南歎異之高祖受禪紹安間行來奔時夏侯端先紹安歸朝授秘書監紹安因侍宴應詔咏石榴詩曰只為時來晚開花不及春時人稱之詔撰梁史未成卒

有文集

五卷

賀知章

舊唐書本傳會稽永興人德仁之族孫少以文詞知名舉進士累遷太常博士開元十年

張說為麗正殿修書使奏請知章同撰六典及文集等十三年遷集賢院學士充太子侍讀知章性放曠喜談笑當時賢達皆傾慕之工部尚書陸象先知章之族姑子也謂人曰吾與子弟離潤都不思之一日不見賀兄則鄙吝生矣晚自號四明狂客又稱秘書外監遨遊里巷屬詞動成卷軸文不

加點咸有可觀又善草隸書好事者供其牋翰每紙不過數十字共傳寶之天寶三載請度為道士求還里又求周宮湖數頃為放生池有詔賜鏡湖剡川一曲御製詩贈行太子以下咸就執別終年

八十

賀朝萬

齊融

舊唐書賀知章傳神龍中賀朝萬齊融俱以越士文詞俊秀名揚於上京

朝萬山陰尉齊融崑山
令人間往往傳其文

徐浩

唐書本傳字季海越州山陰人擢明經有文詞張說稱其才薦為集賢校理見喜雨五色鵲賦

咨嗟曰後來之英也肅宗立詔授中書舍人四方詔令多出浩手遣詞瞻速而書法至肅帝喜之又參太上皇誥冊寵絕一時授兼尚書右丞代宗立封會稽縣公出為嶺南節度使召拜吏部侍郎卒

諡曰定始浩父嶠善書以法授浩浩益工嘗書二十四幅屏八體皆備草隸尤工世狀其法曰怒猊

抉石渴
驤奔泉

嚴維

嘉泰會稽志字正文越州人為秘書郎大厯中與鄭衆裴冕徐嶷王綱等宴其園宅聯句賦詩

世傳浙東唱和維詩一卷及剡隱
居朱放越僧靈澈詩集皆藏祕府

吳融

唐書本傳字子華越州山陰人祖翦賜號文簡
元生融學自力富詞調龍紀初及進士第韋昭

度討蜀表掌書記歷翰林學士拜中書舍人昭宗
反正羣臣稱賀融最先至時左右歡駭帝有指授
壺十許稿融跪作詔少選而成語當意詳帝咨
賞良厚進戶部侍郎俄還翰林遭承旨卒於官

五代

鍾謨

馬令南唐書字仲益會稽人僑建康博學屬文

鍾謨與李德明奉表於周世宗願盡獻淮南之地
既而拒命世宗大怒案誅館中二百人獨赦謨以
為耀州司馬暨周平江南放還國世宗賜黃金五
百兩意以間其君臣也元宗果銜之貶謨饒州安
置謨作絕句十餘章其詞皆悽愴謨尤好古碑奉
使中原每道旁碑碣必駐馬厯覽嘗見碑趺大碣
半沒水中謨解衣以手捫揣然記其文他日
水涸以所錄本就正之無差其爽邁如此

宋

錢易

東都事畧字布白年十七舉進士御試三題日
中而就言者以其輕俊而黜之太宗語蘇易簡

曰朕恨不與李白同時易簡曰有錢易者李白才
也太宗曰若然當用唐故事召至禁林會盜起劍

南不果復舉進士甲科又應賢良方正科策入第四等除祕書丞真宗封泰山獻殊祥錄祀汾陰幸亳州易修所過圖經遂推知制誥遷翰林學士卒易俊逸過人為文數千百言頃刻而就善行草書有集一百六十卷壽雲總錄一百卷洞微志十卷子彥遠明逸皆中甲科寶慶會稽續志吳越王之後父侖死葬於會稽子孫從而家焉

齊唐

寶慶會稽續志字祖之山陰人少貧苦學得書皆自寫誦過一二則不忘郡從事魏虔堅以几

上書令唐誦之開示乃文選頭陀寺記而唐誦不遺一字虔堅驚服登天聖八年進士第嘗進龍韜勝畧賦覽者皆震警兩應制科秘閣皆首選兩對策皆在第一當道忌其切直復排去遣著作佐郎出為南雄州僉判會交趾進麒麟唐據史傳非之斥蠻人給中國衆服其博物以職方員外郎致仕

鑑湖東北有山最奇偉唐命之曰少微而卜築焉有學苑精英少微集

華鎮

寶慶會稽續志字安仁會稽人元豐二年進士官至朝奉大夫好學博古工詩文嘗為會稽覽

古詩百餘篇歷按史策旁考傳記以及裨官瑣語所載記咸見採摭博茲卿稱其詞格清麗興寄深婉足以垂觀來者子初平登大觀三年第為太常博士討論典故据今考古無所阿附靖康初卒

李孟傳

寶慶會稽續志上虞人光幼子也字文授天資爽邁曾幾汪應辰皆器過之宰象山遭太

府寺丞出知江州處州提舉福建常平提點浙西刑獄久之除直寶謨閣致仕藏書萬卷悉置左右繙閱紬繹周而復始每得異書手自校勘多識典故及前輩出處中朝舊事歷歷能道本末有藍溪詩文稿宏詞類藁讀史雜志記異記善錄

姚寬

寶慶會稽續志字令威嵊縣人以父舜明任補官至樞密院編修博學強記於天文推算尤精

完顏亮入寇中外以為憂寬獨推太乙熒惑所次為賊必滅之兆亮果自斃上以其言驗召對移晷疾作仆於榻前寬詞章之外頗工篆隸及工技之事著有西溪集史記補注戰國策五行秘記西溪叢語玉壘書

陸游

宋史本傳字務觀越州山陰人年十二能詩文陰補登仕郎孝宗即位史浩黃祖舜薦游善詞

章諳典故召見遂賜進士出身以書白二府言建康當以暇時建都立國又為樞密張燾言曾覲龍大淵括權植黨熒惑聖聽燾遽以聞上詰語所自來燾以游對上怒出通判隆興府尋免歸久之通判夔州王炎宣撫川陝辟幹辦公事游為陳進取之策又請以吳玠子拱代吳玠及挺子曦偕叛游

言始驗復起知嚴州過闕陞辭上諭曰嚴陵山水勝處職事之暇可以賦詠自適再召入見上曰卿筆力回幹甚善非他人可及嘉泰二年以孝宗光宗兩朝實錄及三朝史未就詔游權同修撰三年書成升寶章閣待制致仕游才氣超逸尤長於詩嘉定二年卒

王厚之

兩浙名賢錄字順伯諸暨人乾道二年進士歷淮西運判改江東提刑進寶謨閣致仕平

生好古博物尤注意金石刻文所著有金石錄三十卷考異四卷考古印章四卷題跋周宣王石鼓文後考訂秦惠王詛楚文精鑒絕識刻畫深淺版辨無遺識者賞其博雅

高翥

姚江逸詩傳字九萬號菊圃工詩畫與劉後邨唱和有菊圃集十二卷

孫嘉

姚江逸詩傳嘉熙戊戌進士累官常州守晚歸四明山中築耕寬堂名談勢語終夕不及好哦

白香山詩意至輒效其體為之有孫常州摘藁行於世

呂冲之萬歷紹興府志新昌人研究經史工詩文陳傳良深器之舉進士歷南康軍僉判與諸生

講道於白鹿洞未幾以疾引退所著壁經宗旨及詩文墨妙世傳之

岑全

嘉靖餘姚志字全之敏茂精明上刺六經之文旁披百氏之旨下通當世之務端平嘉祐間試

詞學擢第歷秘書省校書郎嘗輪對乞黜政府言甚剴切天子為罷右丞相一人乞外補尋引疾歸所著秘錄集十二卷經傳考疑八卷行於世

孫因

兩浙名賢錄晉餘姚令統之後隱居四明山博綜古今工文筆嘗採會稽遺事作越問以補王

十朋風俗賦之缺

俞浙

高浙江通志字季淵新昌人登進士第歷監察御史閉門著述有六經審問離騷審問及韓文

舉隅
諸集

元

徐昭文

萬歷上虞縣志字季章從韓莊節讀尚書試藝不售杜門修業後應辟為吳淞教官著通

鑑綱目考
証行於世

施鈞

弘治紹興府志字則夫會稽人博學能文作詩得唐人體有飲水餘味集

夏泰亨

萬歷紹興府志字叔通會稽人九歲能屬文歷官翰林編修以文雄東南著有詩經音考

矩軒
文集

俞漢

萬厯紹興府志字仲雲諸暨人猶史學著史評八十卷春秋傳三十卷象川集十卷進呈書付

禮部刊行辟
為儒學教授

楊維禎

兩浙名賢錄字廉夫諸暨人泰定丁卯進士授天台尹罷去張士誠據浙西累使求致不

能屈明太祖登位敦迫至京作老客婦謠以見意笑而遣之還松江卒維禎初遊甬東得黃氏日抄歸學業日進居鐵崖山下自號鐵崖先生好吹鐵笛亦號鐵笛子與人交無疑貳尤喜接引後生識不識稱為長者惜不得大用然亦以是得肆力於文章崖錫野刻布列東南宋濂有言曰元之中世有文章鉅公起於浙河之間曰鐵崖先生聲光殷殷摩憂霄漢撫其論撰如觀商敦周彝雲雷成文而寒芒橫逸奪人目睛於詩尤號名家震蕩凌厲神施鬼設其文中之雄乎所著諸集通數百卷

胡一中

萬歷紹興府志字允文諸暨人進士補紹興路錄事著有童子問序四書集箋定正洪範

三益稿等集第一頁亦善詩文有雪林小稿壘虎小稿子澄及從孫學俱彤彤有文名澄著鶴突稿

學有八詠見

山水諸記

楊璩

萬歷餘姚縣志字元度號西園喜學問師事柳待制晉與海內博洽者辨數困之注詩傳名物

類考御史姚黻刻文上之乞降與一官忌者寢其事後以鄉貢補學官值盜起辟地以著述終

陳大倫

宋濂陳大倫墓碣字彥理諸暨人初學易既而更春秋數繹義例揮毫輒雲烟滿紙屢試

場屋不能中繩尺於是棄絕益攻古文詞浦陽吳萊以與學雄文名當代大倫從之講學下及秦漢

以來諸文章大家章有法句有旨青燈夜懸達旦不寐學大進遠近交聘為家塾師元季兵亂避入

欽定四庫全書

卷一百八十

流子里當兩山夾澗作晚香亭三楹間與賓客暢
飲為樂酒酣捉筆咏詩脫帽高歌擊几案為節或
支筇行古石細路間游目思視意若與之相忘髮
已斑白手不釋卷天文地理老釋之書莫不攬其
英華尤善寫竹樹蕭蕭有蒼勁意
著有春秋手鏡尚雅集若干卷

林居

宋濂林居墓誌字溫如新昌人聞天台於子惠
傳伊洛之學執經而受其說又以為言之不文

不能行遠復從韓性遊取文章大家日研摹之其
於分章遣辭之法辨其類不類尤嚴其畧域時黃
文獻潛以文名當代居撰長書為贅潛讀已揭諸
座右賓至則指以示之曰是豈非文耶其器重之
若此嘗以春秋舉應鄉闈不利遂掩闕下惟學子
趨之者如雲性介而通莊而能溫一動一靜皆可
為程式善古文詞尤長於
詩騷有亦愛齋稿若干卷

張憲

元詩選傳字思廉山陰人負才自放走京師創言天下事衆駭其狂還富春山中一日升高望

遠呼所親曰亟去三日逃寇猝至死者五百餘家始悔不用憲言師事楊廉夫廉夫曰吾用三體咏史古樂府不易到惟吾門張憲能之又曰吾門稱能詩者南北凡百餘人求似憲者不能十人

明

趙俶

兩浙名賢錄字本初山陰人八歲能詩文指物輒賦稍長博涉經史為文逼秦漢賦尤擅美部

使何約至越聞俶名延見之從容問諸史俶談上下三千年事及形勢如身所履者約歎曰窮年讀史不如與趙生半日語尋登進士明興徵拜國子助教

郭傳

名山藏字文遠會稽人洪武七年太祖御元武樓問學士宋濂天下宿學濂對曰會稽有郭傳

者學有淵源其文雄贍新麗而論議根據六經波瀾相推若不知其所窮一代奇才也因持其文以進帝召見謹身殿奏對稱旨授應奉翰林文字日侍左右備顧問每命題撰著輒加賞賚陞起居注
考功
丞

呂不用

毛奇齡呂不用傳初名必用字則行新昌人年十三應元至正鄉舉未午而出院主文者

奇之索其次場不得知其不終試深惜之不用傳孔孟之學而故以文豪與天台陳東之會稽王宗成廬陵曾伯曼金華宋濂青田劉基為友洪武初以經明行修辟授本縣訓導時兵革初靖士不識文藝不用疏六緯四籍諸史之學授生徒且身為率先一時蒸蒸日上化後引疾解官累辟不起著有牧坡稿得月稿
力田集行於世

唐肅

朱彞尊唐肅傳字處敬先世家杭州新城遷於山陰肅博通經史旁究陰陽醫卜書數之學兼

工篆楷書元至正十九年中浙江鄉試歷嘉興路儒學正洪武三年召修禮樂書擢應奉翰林文字

兼國史院編修旋以疾失朝免官謫佃濠之瞿相山歲餘卒

謝肅

萬厯上虞縣志字原功洪武間舉明經歷福建僉事克持風紀所著密菴稿侍郎劉鵬稱其詩

文補志闕証史謬動闕世教與會稽唐肅齊名時人謂之二肅

錢宰

朱彞尊錢宰傳字子予又字伯均會稽人吳越王鏐十四世孫元至正間中甲科教授鄉里洪

武初徵修禮樂書授國子監助教十年以年老告歸二十三年召為會試考官二十七年詔徵儒臣定正尚書蔡氏傳宰暨張美和揭軌等二十六人皆被召命開局翰林院賜宰等綺繒衣被入朝班

侍衛之首燕坐殿中時帝建酒樓於城門外其一曰醉仙命宰等飲其上并給以鈔宰等各獻詩稱

謝書成宰尋告

歸卒年九十六

蔡庸

列朝詩集傳字唯中越人家貧教授與唐之漳鎬續毛鉉並以詩名時稱唐鎬毛蔡

王至

萬歷餘姚縣志字孟陽明春秋三禮之學為文章比物連類下筆沛然經其指授多為名儒平

居恭慎遇事援經質史英氣絕識凜如也明初為於潛教諭以終

錢遜

列朝詩集傳字謙伯山陰人洪武中任孟津知縣改戈陽坐累謫戍交趾復以薦對策稱旨授

文昌主簿所至有聲跡中更餉贈卒能保全壽考有謙齋集二十卷

李勗

列朝詩集傳字文勉山陰人自少好與文士游鄉先生鎬續王誼鄭嘉謂曰爾欲與我輩遊須

讀書乃可感悟力學遂成名儒時人稱鎬王鄭李詩宗晚唐好學李義山

宋元僖

姚江逸詩傳字無逸少穎悟力學父欲奪之於市佑胥吏元僖泣而辭受學於楊鐵崖盡

得其詩文法中江浙副榜補繁昌教諭尋棄歸洪武初召修元史分撰外國傳事畢還山復與桂彦良同徵主考福建元僖詩實而不枯熟而不腐入香山之室有庸菴集十卷

王受益

成化紹興府志字子謙山陰人初受書於錢宰又受春秋於楊澄源嘗取汪氏纂疏李氏

會通程氏本義三書折中之名曰春秋集說洪武初詔與張美和劉三吾校書經書成賜名曰尚書會通除陝西學正五典名藩鄉試及會試文衡得人甚盛陞國子助教

唐之漳

朱彝尊唐肅傳肅子字愚士以字行嘗為李善長草露布太祖異之問起草者誰也善長

以實對帝令飛騎召之至東華門已噍黑入見帝
明燈坐便殿問曰汝曾草露布耶對曰然俄而中
官以短几置前帝令坐授以封諸王冊曰汝其潤
色之對曰臣萬死不敢帝曰姑旁注之乃奉命注
畢仰視燭影中帝色喜良久乃出性孝友父死亟
骨歸葬於赤土山求父遺文雖荒郵敗壁高崖斷
石靡不蒐訪纂錄時時伏讀聲淚悽咽聞者為之
掩涕方孝孺薦於朝建文二年授翰林院侍讀
夏時兩浙名賢錄字中甫上虞人博學善屬文已而
失明自號守黑子與二弟中孚中畢唱和為文
一篇成輒命筆之次
而成帙曰守黑稿

毛肇宗

萬厯紹興府志字克敬山陰人幼孤篤學居
僧舍三年不出戶永樂中登進士時方重藩

選授周府教授肇宗喜吟咏
興寄高遠有耶溪集二十卷

胡粹中

列朝詩集傳名由以字行山陰人治毛詩春秋三傳永樂初為楚府右長史著讀史筆記

元史續編
行於世

朱純

列朝詩集傳字克粹山陰人淳雅有儒行與羅頤張翬輩結鑑湖詩社好遊佳山水所至多題

詠有陶鈇驢
背自怡等稿

高廩

萬厯山陰縣志字居豐號畏巖山陰人兄閔弟臺皆登甲科廩獨絕意仕進常從朱純學唐律

釐為三十卷雒陽劉半齋名為探驪者也著有會稽懷古集詩衡史學稗雅捷徑諸書

陳贄

姚江述詩傳字唯成以薦為儒學訓導纂修宣廟實錄贄採兩浙事蹟上之稱有史才任翰林

侍詔陞廣東叅議遭太常少卿致仕投老西湖與騷人墨士為詩酒之會評者謂其古選逼陶柳近

體駁駁
盛唐云

胡楨

舊浙江通志字用良新昌人結草亭於宅外聚古今圖籍終日吟誦其中不慕仕進所著有草

亭愚辨諸書與江浦莊景
嘉禾呂原以詩文相友善

薛綱

萬厯山陰縣志字之綱天順八年進士拜御史巡按陝西督南畿湖廣學政厯廣東按察使雲

南布政使皆善其職尋謝事歸綱不矯激而能
持正為文淳雅所著有三湘集松陰蛙吹等篇

吳駟

兩浙名賢錄字文英山陰人博學洽聞嘗作東山賦或以為不下孫興公李東陽見駟所撰略

賔王廟碑歎為文章宗匠其志來傳記率
有體裁所著述頗富而紹興先達傳記傳

黃海

舊浙江通志字伯用以字行餘姚人天順六年
舉人為建寧教諭工詩倪宗正稱其農談戚語

皆有詩情有竹
橋十詠行世

駱象賢

於越新編諸暨人為文直述事情不求華綴
嘗斟酌六禮之要表帥鄉俗為園於楓溪之

上圖書滿屋玩讀不輟所著有羊棗
集薦終易覽溪園遺稿歸全等書

黃韶

舊浙江通志字九成餘姚人成化己丑進士官
至江西提學僉事有道南十景詩與張弼桑悅

唱和從子嘉仁字半山於何李
時不染習氣詩情嫣然秀出

馮蘭

姚江逸詩傳字佩之成化己丑進士選庶吉士
仕至江西提學副使其在京師與李東陽謝遷

雅相好遷既歸田與蘭唱和無虛日間書之以寄
東陽東陽亦一一和之是時東陽為一世宗工而
於蘭則敬為老友各有
樂府咏史詩號為新體

楊榮

姚江逸詩傳字時秀成化壬辰進士以工部都水主事視河壽寧坐事下獄釋歸尋卒榮工詩

會試舟中取唐音和之月餘成帙一時風尚和唐音者累累而榮能得其風致

司馬聖

萬厯山陰縣志字通伯博極墳典成化辛卯冠省試明年成進士以御史視學南畿考文

序士無錙銖失平擢福建副使致政歸縱情邱壑嘗榜其門曰獨呼明月常陪醉不負青天早放閒所著有蘭亭諸集

張文淵

萬厯上虞縣志弘治己未進士仕至南禮部郎談經授徒所著有衛道錄諸圖便覽八音

東泉百詠奏聞世廟內衛道一編與傳習錄叅駁而主於翼朱又善真草筆力遒勁得朱文公書法

周楨

獻徵錄字天兆山陰人弘治壬戌進士選庶吉士授檢討尋與纂修孝宗實錄執事經筵正德

中以疾乞歸禎長於古文詞醇厚典雅有西京遺
響詩宗陶謝清微淡遠於性理之學沿流汴源兼
綜條貫一以朱子為歸
所著有梅川集十二卷

姚翔鳳

萬厯上虞縣志字夢禎嘉靖壬辰進士任兵
部主事暇輒讀書耽耽如儒生厯官至行太

僕卿免歸益肆力於著作傾貲賄奇書兀首窮年
以自娛乞言者隨至輒應所著有疏註度傳餘生
近記羅東拙稿

諸燮

兩浙名賢錄字子相餘姚人嘉靖乙未進士授
兵部主事守山海以簡亢忤巡邊大僚謫茶陵

同知未赴南歸居錢塘遠近士慕燮經學執贄受
業者百餘人因不復有仕進意踰年量移潮州通
判所知皆致書勸駕始隨牒往遷邵武同知兩佐
郡皆寬簡御下勤於勸學士民皆懷之以艱歸有

自閩粵負笈來學者輒館穀之不靳也開化諸生走請傳經於其邑六月返擢過嚴陵濯足灘上溺死

黃尚質

姚江逸詩傳號醒泉嘉靖己酉舉人歷官息縣令景州牧是時越中詩人山陰有陳鶴徐

渭姚江則尚質與楊珂詩筒往來風華掩映而尚質與珂渭兼猜繪事尤為時所貴重

陳鶴

兩浙名賢錄會稽人博綜墳典窮日夜不休年十七襲蔭百戶非其好也棄官著山人服人遂

稱為陳山人詩文高古若騷賦詞章草書圖畫能盡法諸名家於是軒蓋駢集無不心折願交而去

既卒同邑徐渭表其墓

徐渭

陶望齡徐渭傳字文長山陰人九歲能屬文年十餘做揚雄解嘲作釋毀為諸生胡宗憲督浙

江招管書記時方獲白鹿海上用渭表以獻上大
嘉悅其文宗憲以是益重之時督府勢嚴重文武
將吏庭見無敢仰者而渭散巾幘衣直入無忌宗
憲常優容之渭亦矯節自好無所顧請及宗憲速
渭慮禍及遂發狂疾坐繫獄中以言者力獲免及
老貧甚需文自給人操金請詩文書繪者值其稍
裕即百方不得遇窘時乃肯為之渭嘗言吾書第
一詩二文三畫四識者許之所著文長集闕篇櫻
桃館集各若干卷注莊子內篇參同契黃帝
素問郭璞葬書四書解首楞嚴經解各數篇

楊珂

以姚江逸詩傳字汝鳴號秘園從王文成講學不
以科舉為事自放山水間天台四明題咏殆徧

有一觀側石橋時為暴漲所壞珂書醉卧石三
字於上水亦迂道避之其書法與徐渭齊名

孫鑛

紹興府志字文融餘姚人文恪陞之子萬厯甲
戌會試第一嘗欲輯五車一笈謂易詩書可云

三墳周禮禮記春秋三傳可云五典儀禮管老列
莊國語國策楚騷可云八索荀韓呂淮南太元史
漢文選可云九邱歷官自主事迄南大司馬爛然
有聲而虛懷自下以孟秋雷士貞為直友唐鴻徵
趙南星為諒友余寅周弘禴為多聞
友接引後學無町畦人稱月峯先生

王思任

紹興府志字季重山陰人幼穎絕黃洪憲得
其文謂異日必名世萬厯乙未成進士三為

邑令遭袁州府推官有能聲厯刑工二部主事僉
事江西能料寇出沒作防禦計已聞燕京臨輒放
浪山水間詩歌書法與董其昌陳繼儒相頡頏年
七十二棄家入秦望山卒有清暉閣謔菴文飯等
集

葉憲祖

姚江逸詩傳字美度萬厯己未進士知新會
縣遭工部主事逆璫建祠不為監工因削籍

崇禎間累官湖廣副使陞廣西按察使與孫鑛以古文詞相期許鑛刻畫字句之法憲祖繼筆匠心不沾沾於離合所長尤在填詞直追元人與之上下

丁進

上虞縣志字印趨博學強記於性理之學尤邃萬厯己未成進士選庶吉士授檢討魏璫假子

撫民借衣命服入朝進斥之璫怒與同官六人陳子壯林鉉等俱削籍璫敗六詞臣同日召還戊辰分考禮闈晉左春坊經筵日講官癸酉主試江南卒以忤權要歸里

陸曾輩

會稽縣志字章之喜讀書肘著案案為之穿背誦史記自首卷至終篇不失一字嘗示門

人曰對人始檢身必不能檢身閒卷始讀書必不能讀書握管始作文必不能作文其為文句字皆鑪冶而出少不當意輒毀去所存者有詩學內傳外傳春秋所見所聞所傳聞三卷集史曰簡要錄

綱目叅同又作字原闕天錄所手鈔
計丈有五尺古文詩賦別編成十卷

馬權奇

會稽縣志字吳倩崇禎辛未進士授工部主事司琉璃廠與閭忤為所中事白歸不事家

人生產飲酒讀書手丹鉛不輟避兵死於田間著有易經解詩經誌麟經誌老子解名臣言行錄諸書

國朝

來集之

紹興府志字元成蕭山人崇禎庚辰進士司李皖城皖受張獻忠蹂躪集之苦心調劑會

左良玉兵東下遠近震驚皖賴集之得無恐尋家居三十年手不釋卷著有易圖親見讀易偶通卦

義一得春秋志在四傳權衡
焦書南山載筆倘湖近刻

祁芳佳

紹興府志字止祥山陰人彪佳弟天啟丁卯舉人以教諭遷吏部司務尋以疾歸工詩文

善書畫四方來索者輒呵凍流汗以應家居數十年以壽終

黃宗會

舊浙江通志字澤望餘姚人尊素第三子崇禎中拔貢讀書一再過不忘一日所讀必盡

百頁以為程有事則次日倍其常課自經史四部而外釋道二藏未嘗不一周也詩文古澹而字有根據不見用事之跡著有縮齋文集十卷其注釋教書如牛毛繭絲為其教者亦歎以為不及後人

注標嚴多採用其說

徐咸清

紹興府志字仲山上虞人居會稽之嵇山生而慧一歲識字五歲通一經甫蓄髮以官監

生應鄉舉有文名長娶家宰商周祚女女亦能詩乃就嵇山開廣庭構藥欄設長筵發所藏書散帙

之對生縱觀暇則抽牘各為詩如是有年著小學一書博取訓纂說文玉篇篇海諸書以正字形取切韻唐韻廣韻集韻諸書以正字聲而縱考經史子集暨唐宋元諸大小篇帖凡有繫於釋文者悉搜採以正字義合若干卷名之曰資治文字康熙十七年以宏博薦歸里卒

王雨謙

紹興府志字白嶽山陰人幼精敏肆力古文漁獵甚富崇禎癸酉舉於鄉明亡鍵戶著述

與女夫俞公穀共輯廉書若干卷曰後世必有知我者年九十卒

張杉

舊浙江通志字南士山陰人為詩宗開元大厯有虞賓山房集行世紹興府志杉少負才名與

其兄梯弟撈號三張子撈死梯劇飲成疾杉不脫衣履晝夜坐梯所梯死杉日與蕭山毛奇齡相倡和奇齡有作必呈杉杉以為可乃收之初崇禎己卯杉寓蕭山邑宰羅明祖集文士於河陽館課文

其題為德行顏淵三十字課畢復揭一籤於卷末
曰漢人有名曰顏子曰曾子曰仲弓日子路子游
子夏者何人也座中無有能應者衫從容書其下
曰顏子黃憲也仲弓陳寔也張曾子張伯饒也城
頭子路者東平晏曾也子游張寔之孫猛也漢同
時有兩子夏一杜欽一杜鄴也明祖辟席揖之問
其年才十九云子燧康熙
庚辰進士官吏部主事

包秉德

蕩浙江通志字飲和蕭山人為諸生所著詩賦雜文蟲戈編合五十卷與來驤陳清蔡立

國沈禹錫蔡仲光爭尚著
作同時齊名稱固陵六子

徐緘

毛奇齡二友銘字伯調家山陰之木汀又家梅市初擅舉子文為雲門五子之一既以詩古文

爭長海內而未能委曲隨世低昂故人多媚之好
鍊沖舉餐氣啜液嘗作遊仙詩以自喻其著讀書

說每日以半治經限三葉半治史限二十葉閱三年訖工其勤如此尤富聞見口吃不善辨而旁通曲引歷歷穿貫叩之無不鳴有詩十卷文六卷已刻者名歲星堂集

來蕃

毛奇齡二友銘字成夫蕭山人居貧所儲圖史外唯瓶盎十餘實米鹽紵絮於其中每出行書

衣筆裹手自持抱遇故人當意者拱揖避道左不當意輒去十歲出試即冠軍尋棄舉業為詩古文詞始以博大自喜好為瑰奇倜儻之語已又力追先秦崇尚奧衍有北沙集藏於家嘗作故明二歲賦雄博桀驁抵轢前古初不示人及示人以口路厭讀之惟太倉吳偉業見之曰此馬季長之賦也少嘗遊於劉戴山之門戴山曰子捐者也蓋有所不為云

徐廷玲

蕩浙江通志字蜚度上虞人博學篤行教讀自怡所著有鹿溪集宗集溪西集

董瑒

紹興府志字叔迪號無休會稽人年七歲畢讀五經十歲能綴文陳子龍為推官見而奇之少

時從學劉宗周預證人會後乃較錄其遺集晚為浮屠而不讀佛書亦不居禪室以蔬食終其身

姜廷梧

舊浙江通志字桐音餘姚人長於詞賦聲噪江淮間有文集行世

邵廷采

紹興府志字九思餘姚人諸生少從韓孔當講學於姚江書院交戴山弟子聞誠意慎獨

之學欣然有得數困舉場好求經世大畧每談忠孝節烈事奮袖激昂神氣勃發於明末諸臣尤能該其本末搜討撮拾欲成一書稿初就未竟而卒有思復堂集行於世

趙廣生

舊浙江通志字公簡山陰人從學戴山為文高古曲折有集六卷行世

張岱

紹興府志字宗子山陰人年六歲雲間陳繼儒命屬對奇之及長文思坐涌好結納海內勝流

家世通顯服食豪侈日聚諸名士度曲徵歌諧謔
雜進及間以古事挑之則自四部七畧以至唐宋
說家叢殘瑣屑之書靡不該悉明末避亂剡溪山
家益落意緒蒼涼語及少壯穠華自謂夢境著書
十餘種率以夢名而石匱書紀前代事尤備
年六十九營生壙於項王里又十餘年卒

錢霍

紹興府志字去病會稽人上虞籍為諸生貢太
學精舉子業然不好獨好為詩其詩自關阡陌

勁出橫貫不假雕飾而姿態橫生性豪喜談酒酣
興至音吐如洪鐘目閃閃有光驚起坐客性狷介
耻以詩文干士大夫嘗游京師故人居華要者不
授一刺唐事沈荃獨嚴重之曰今之謫仙也鄉人
姚儀好霍詩
為梓其集

傅性詰

鄉賢留祀冊字敏水號熟園會稽人甫成童
即淹貫百氏制舉業外尤工騷賦格律詩補

博士弟子試輒冠其曹性至孝父癸重舉明經老而篤學性詰惟日以讀書誦藝為色養承歡之具嘗曰事親期於養志吾寧屑屑求刳祿以供甘旨耶奉母尤謹扶持抑搔未嘗假手於人親歿讀書嵇山菴二十年講求性理之學著四書周易正蒙辨疑若干卷每語人曰讀書期於明理不疑何由得信不辨何由得明昔人作存疑不敢自居於無疑也吾作辨疑不敢自安於無疑也所選古今文才調集準唐賢韋穀論詩之義以論文大抵斂才於法而不欲以一往馳騁為才其持論甚峻學者皆受範焉為人中介而外和於取與一無所苟而見義必為生平於讀書外無他嗜好易簣之日猶口授或問第四章復舉南宮适語類中一段為朱子未定之論當以集注為正臨革呼其子曰思報國恩惟有文章餘無所及所著有熟園闕存稿甲乙丙三集嵇山學古錄驛寓小草若干卷藏於

家

蔡宣之

鄉賢留祀冊蕭山人潛心理學羽翼經傳學者奉為宗匠名其門曰匠門世業尚書嘗採

歷代史傳錄其可證經旨者纂輯成書發明奧義子孫守其遺稿以經義成名者皆其一家言也

陳至言

鄉賢留祀冊字山堂蕭山人康熙丁丑進士選庶吉士授編修與纂四朝詩選癸未丙戌

兩為會試同考官稱得人己丑督學河南前任學政湯右曾擅公明之譽至言繼之後先頡頏焉性孝事母曲意敬謹鄉黨無間言幼工詩古文與同郡張邇可齊名毛奇齡數稱之謂能守古人三義八法之意而不變所謂工生於才達生於明者著有苑青集行世

張鉞

公舉事實字鼎仲會稽人元忭曾孫守家學讀書過目不遺比長博極羣籍殫思研究期於必

得每日書以傳信豈可蓄疑以自誤轉以誤人與
同郡金赤蓮燭史華青許宋長白俊為文字之友
號越中四子成康熙丙戌進士授商水令革浮稅
減耗羨著為額有疑獄經十餘年不決立白之俗
駕命案誣累嚴為之禁令商三年隣邑捕蝗無虛
日獨不入其境分校棘闈所拔皆中州名雋去之
日民攀送不絕於途歸即杜門却軌凡同年之仕
浙者終歲不一識其面以問字至者則終日孜孜
延納無倦色督學守令延主嵇山書院固辭不獲
乃出其先世南軒陽和論學之蘊以示人多所造
就馬家極貧然遇宗黨中有不給者輒周之雖歲
暑必肅衣冠即燕居未嘗跛倚著有春秋訂傳藝
苑筌蹄及會心
樓文集行世

浙江通志卷一百八十

欽定四庫全書

浙江通志卷一百八十一

人物

六

文苑

四

台州府

三國吳

虞翔 任次龍

會稽典錄山陰朱育曰文章之士立言繁盛則鄙陽太守章安虞翔與同

邑任次龍各馳
文檄畢若春榮

唐

項斯

赤城志郡人字子遷張為唐詩主客有清奇雅正升堂項斯之語擢進士第官至丹徒尉張洎

集序作

江東人

宋

楊蟠

宋史本傳字公濟章安人舉進士為密和二州推官歐陽修稱其詩蘇軾知杭州蟠通判州事

與軾倡酬居多平生為詩數千篇後知壽州卒

周弁

寧海縣志字君儀父良史沒於日本弁不及見母施氏教之登嘉祐進士知青陽縣好讀書至

老手不釋卷家貧未嘗語生事甚為王安石所器重有文集二十卷韻類十七卷行世

陳貽序

臨海縣志字叔彛治平元年進士性剛介有才學以詩名為蘇軾曾鞏所知官終湖南運

判所著有

天台集

朱烱

臨海縣志字寶臣元豐五年進士文詞藻麗一時諸公碑志多出其手有朱氏易行世

王齊輿

寧海縣志字之孟登進士知於潛再知崇安鑿渠星黃陂溉田萬餘頃百姓德之為立生

祠擢知郢州遷告院刪定上殿論安邊擇將足國裕民之道高宗大喜曰王齊輿南人似北議論可采既而臨安彌旬雨雪民乏食相枕藉死齊輿偶對及之上驚曰無人語此即命所司賑給之後以直煥章閣致仕營雲壑園與親故為真率會平生博學強記手不釋卷簾衣糲飯嘗如諸生而與名公鉅卿酬倡語多奇崛社中目為詩虎有雲壑集

劉知過

天台縣志字與幾紹興中特科監南嶽廟與兄知變俱以文名尤工於詩時號二劉所著

有江東天籟吳子良為之序

王卿月

臨海縣志字清叔博學工古文詞不隨時好力還古雅多藝能雖音律卜筮無不貫徹中

乾道五年進士仕秘書郎權中書舍人直學士院掌制誥所草詞百餘篇深得代言之體嘗草胡銓制云吾寧身蹈東海獨魯仲連不肯帝秦至今名重泰山微蘭相如何以存趙時論多之除太府卿卒著有醒菴集

王及

寧海縣志字達之乾道中進士以信州守致仕及學問淵遠為詩文粹而有法得人片言抄聚

以寓品裁命曰藥籠取前人立身行己之事與志合者及諸時事之變從而折衷之命曰自信命所

為文稿曰知過勇自刻厲老
不少衰有桃源雜著三十卷

王文

舊浙江通志字希道警敏刻厲嘗師事王公綽
葉水心取周易蒙卦之義以名其齋因購古今

載籍枕藉讀之已而豁然有悟援筆為文日數千
百言與陳耆鄉吳子良為友著有東谷集行世

吳子良

臨海縣志字明輔寶慶二年進士官至湖南
運使太府少卿幼從陳耆鄉遊長登業適之

門適稱其文意特新語特工韻趣特高遠雖昔之
以文名世者不過若是何止超越流輩而已所著
有荆溪集

林表民

台州府志字逢吉父詠道好古博雅儲書甚
富逢吉承其家學而與陳耆鄉吳子良遊嘗

同耆鄉修赤城志又自修續
志三卷輯赤城集二十八卷

于有聲

黃巖縣志字君實跌宕不羈以詩自豪嘗舉浙漕已而謝去放浪江湖持其錦囊詩一帙

歸謂家人曰平生事業盡在是矣王侍郎居安為題其集

戴復古

黃巖縣志字式之號石屏從林景思徐似道遊又登陸游之門講明詩法後又走東湖浙

西襄漢淮粵凡空迴奇特荒怪古僻之蹤靡不登歷蓋二十年然後歸而詩乃大進真德秀稱其句法不減孟浩然由是遂名天下有石屏集行世

高耕

臨海縣志字志伊詩文意不拔俗語不驚人不止晚歲益奇所著有帚金集

聶蟾

黃巖縣志字少明雅好吟咏多有真趣所著有金鰲詩卷車玉峯題云輕煤快筆非他人搜括

賢胃者可到

虞似良

黃巖縣志字仲房淳熙中官成都院判詩詞清婉得唐人旨趣尤工隸書時隸法多宗漢

似良更出新意無一食頃去筆札卧猶運指習點畫衾稠當指處皆裂晚益奇古篆書益精有篆隸

韻書行世從孫謙字子益隸書逼真似良時稱小虞

丁希亮

葉適丁希亮墓誌字少詹黃巖人生二十九年適遇之於錢塘後二年適教諸生於樂清

少詹始來人謂其年已尊老相與背笑之少詹不愠也又明年變名字從陳同甫於龍窟同甫驚曰是聲聲謬謬非妄帖為學徒者既而少詹畫師碩儒畫友良士盡聞名言夜誦逮晨手抄滿屋縱筆所就詞雄意確論事深眇皆有方幅人於是奇少詹為非人力可及卒年四十七

左緯

黃巖縣志字經臣強記善屬文劉元禮周行已皆兄事之初業舉子曰此不足為學文如韓退

卷一百八十一
之詩如杜子美吾將遊其藩焉真德秀稱其
避寇七詩可比老杜七歌有詩集行於世

舒嶽祥

兩浙名賢錄字舜侯臨海人寶祐進士官終
承直郎年二十六時以文見吳子良子良稱

其異秉靈識如漢終賈後果以文學名所著有史
述漢砭補史家錄蘇野稿避地稿篆畦稿蝶軒稿
梧竹里稿三史纂言談叢叢續叢殘叢傳叢津昔
遊錄深衣圖說凡二百二十卷學者稱為閭風先
生

楊說孫

舊浙江通志九歲通貫經史人稱神童有司
試經義畫八卦賦河圖洛書論據筆立成

胡三省

台州府志字身之寧海人寶祐進士終朝奉
郎因資治通鑑音義釋文各本乖異刊正為

廣注九十七卷著論十卷以薦叅賈似道軍言輒
不用歸而遇亂失前書復購他本為之注始以考

異及所著者散入通鑑各文之下歷法天文則隨目錄所書而附著焉若釋文之外謬悉改正之著辨誤十二卷復有竹素稿一百卷

丁雷

天台縣志字元震所著高林詩稿葉夢鼎王應麟皆有題跋

車安行

台州府志字正路黃巖人游陳潛室之門得武夷宗旨尤工於詩所著有鏤水集竊林吳

詠稱其寬平雅淡不與近世較圭角而自得清修之趣

翁時可

台州府志號處靜黃巖人善樂府杜清獻公範稱之曰如絮浮水如荷濕露縈旋流轉似

霑翰墨之妙戲翰墨之妙

黃宏

赤城新志字子約黃巖人博覽羣經尤長詞賦有以史才薦者不就落魄江湖幾三十年文章

流播天下
有穀城稿

徐韶

舊浙江通志字君美學於王蘊文嘗著正朔郊祀禘祫辨及春秋精義學者尚之

元

陶宗儀

嘉靖浙江通志字九成黃巖人少舉進士不第即棄去務古學於書無所不窺出游浙東

西師路國張翥永嘉李孝光京兆杜本尤刻志字學工篆筆至正間浙帥泰不華南臺御史丑閭辟舉行人校官皆不就張士誠議以軍諮屈亦不往避地松江之亭林力耕以給食雅好著述雖在畎畝恒以筆研自隨嘗置一甕於樹間遇有所得輒書以投其中久之取次成帙名曰南村輟耕錄凡三十卷行於世又著說郛一百卷書史會要九卷四書備遺二卷

應文虎

黃巖縣志字彥文通易詩書三經而長於詩
嘗遊京師賦梅魂詩虞集楊載見之亟加嘆

賞稱為應梅魂黃潛
薦之不起人高其行

李洧孫

王潛李洧孫墓誌字山甫寧海人以詞賦中
選第一擢甲戌進士第授黃州司戶叅軍未

上而黃州以版圖歸國棲遯海濱者二十餘年郡
府以名剡上乃為強起抵京師述大都賦以獻時
大德二年也六年乃得杭州路儒學教授選為江
浙同考官天歷二年卒學者尊之曰霽峯先生所
著詩賦贊頌箴銘表啓碑志序說總
若干卷重修台州圖經列於學宮

柯九思

兩浙名賢錄字敬仲仙居人官至奎章閣博
士號丹邱生與虞集趙孟頫為友工於詩尤

善畫竹木以書法作之筆勢生動每
得意輒題詩其上一時稱為三絕

陳德永

元詩選傳字叔夏黃巖人從林紘齊盛象翁遊得王魯齋之學辟為和靖書院山長歷官

浙江儒學提舉杜本稱其文似歐陽子尤長於詩所著有兩峯慙草

邱應辰

太平縣志字詠性博極羣書元貞間舉青田教諭不就作正異復井田諸論有憂憂集歲

於家

丁復

元詩選傳字仲容天台人延祐初遊京師公卿奇其才薦入館閣當國者不能用不俟報可翻

然去之遂家金陵宅故有兩檜樹醉則倚而吟唔因名其什曰兩檜亭詩中山李桓以為仲容學博才敏為詩精麗奇偉格超而趣遠深入古人間奧云

杜本

台州府志字伯原其先自京兆徙天台為人沉靜寡欲天文地理律歷度數靡不通究無工篆

隸所著有詩經表義六書通編
十原等書學者稱為清碧先生

葉嗣孫

黃巖縣志字本心大德中舉明經不就嘗試
方石詩路公張翥見之呼為葉方石有詩集

行世子道滋博通經史所
著有韻海明珠龜客集

王大本

寧海縣志字仲孚舉進士官至秘書丞著
述頗多方遜志謂其博學多識為元間人

舒卓

寧海縣志善屬文至正辛卯鄉試左榜金華趙
友桂有文才豪放自高每讀人文章一語弗契

輒覆手掩几上視雲漢作他語獨善卓卓至夜談
屢及旦飯至且辨且食入咽不計多寡輒棄去蓋

其文為所

深服云

黃庚

元詩選傳字星甫天台人所著有月屋漫稿其
自序曰臨配時習舉子業不暇為詩自科目不

行始得脫屣場屋放浪湖海凡生平豪放之氣盡發為詩若醺難之出甕天也庚嘗於越中詩社試枕易詩推第一一名重詞場

張明卿

宋涑張明卿菴誌字子晦天台人教授里中不嗜榮名築幽齋於智山列圖書左右甃石

時花遇賓至劇談賦詩望之猶世外人也作為文章珠貫玉聯有臺閣之風時遊戲翰墨筆法穠逸可翫燕畫竹石韻度清麗頗近文湖州至其學術則一以朱子為宗有言志稿四卷六藝編六卷存養錄十二卷尚友編五卷世運畧八卷家傳一卷政事書一卷

潘從善

太平縣志字擇可至元九年進士累官同知制誥兼國史編修終福建儒學提舉攻古詩

文善小楷書名重士林所著有松溪集

郭公葵

黃巖縣志字東心元末翰林編修博覽載籍工詩文張承旨翥嘗評其詩文整密高古雅

趣絕俗進士唐肅亦謂其詩清若元酒雅若朱絲當時以為知言所著有諤軒集

曹文晦

元詩選傳字輝伯天台人少從兄文炳學穎悟多識而雅尚蕭散好吟咏大有情致築室

讀書自號新山道人元季能詩者以輝伯稱首

林昉

太平縣志字仲昉由薦辟官國史檢閱善屬文尤深經學嘗作穀梁論辨震雷月食等說陸修

正謂可以羽翼經傳宋濂謂乳甘記一篇行文絕類西漢所著有丹邱小稿半山文集行

劉仁本

列朝詩集傳字德元天台人以進士業中乙科歷官江浙省左右司郎中至正庚子治師

餘姚作雩詠亭於龍泉左麓彷彿蘭亭景物集名士趙倣朱右以下四十二人修禊賦詩仁本為之

序

明

楊大中

臨海縣志博學洽聞仕元為著作郎洪武中召見留文淵閣數月以老歸所著赤城志及

隨手錄
三十卷

陶凱

臨海縣志字中立太祖起兵訪延上坐用其策以有天下定鼎後徵授翰林院編修與學士宋

濂等纂修明史又撰大明集禮為五等封爵議定科舉式撰大明樂章九闕陞禮部尚書長至日太祖出宿齋宮凱謂不可無篇什以示後世遂以星臨萬戶動月傍九霄多為韻凱首唱餘以次屬和太祖大悅命學士宋濂叙其首尋出為湖廣行省叅政復為國子祭酒致仕後坐罪著有陶尚書集

葉見泰

赤城新志字彛仲寧海人明師取台州見泰衣褐造軍門謁其帥帥趣見之語三日夜不

休署部從事遂取永嘉取福建取兩廣皆與有力焉未幾使安南諭其君長來貢以功授高唐州判

官遷睢寧令終刑部主事所著有蘭莊集弟惠仲亦能文號二葉

陳基

朱異尊陳基傳字敬初臨海人從學黃潛遊京師授經筵檢討既而歸里奉其母入吳教授諸

生嘗參張士誠軍士誠稱王基諫止不從洪武二年召入與修元史還卒於常熟縣基有文譽最為戴良所稱謂元之能文者虞揭黃柳繼之則莆田陳旅新安程文臨川危素其後則基而已

許伯旅

黃巖縣志字廷慎洪武初由選貢官刑科給事中以詩名時稱許小杜林公輔嘗見其感

興諸詩問其得何法而然伯旅曰法可言也法之意不可言也上士用法得法之意下士用法得法

之似吾詩幾用法矣識者以為不妄著有介石集

徐一夔

朱彝尊徐一夔傳字大章天台人吳元年詔儒臣纂禮書勅舉博古通今之士一夔首被

徵草創既就而還會元史成而元統後無事蹟可徵將有事續修王禕以一夔薦復至京師洪武三年大明集禮成官杭州府儒學教授命編日厯靈谷寺初建勅一夔自杭州撰碑文以進稱旨賜蟒衣彩幣一夔工於文深而不刻質而不俚當元季自天台徙嘉興卜宅於春波門外白苧里

陶宗儒

臨海縣志一名宗誼字漢生宗儀之弟洪武時官禮部員外郎與會稽陶肅上虞謝肅等

一十九人以詩名於時號稱皇明雅頌

方行

列朝詩集傳字明敏黃巖人詩名東軒集宋濂序云明敏仕元嘗叅知政事於江浙行中書省

襟度瀟灑善談名理於書無所不讀古詩俊逸超羣律詩麗婉清切於國初居然勝流也

郭濬

赤城新志字士淵寧海人洪武初詔郡縣貢秀士各一人寧海以濬名上既而上書論當世急

務甚切召對忤旨令入太學太學所養士數千百人見其文咸吐舌驚嘆為不可及濬亦氣高自負由是名起一時同學者見其名高乃以弗及為憾諧諸師誣奏抵罪

詹鼎

寧海縣志字國器性豪邁方國珍聞其名強致之時明師臨慶元鼎為草表謝詞甚恭而辨太

祖見之曰孰謂方氏無人乎更以國珍為左丞召鼎至京師為書萬餘言須車駕出上之太祖立馬授讀付左丞授以官後以刑部郎中謫陝西卒

王修德

赤城新志寧海人與郭濬皆以文名初宋濂見方孝孺文歎曰真奇才也遂留左右不忍

舍繼見修德與郭濬文喟然曰吾道台矣林公輔嘗評之以為方之文如春氣方至津液之色充滿廣宇飛潛動植各有生意郭之文如蒼鵲摩空飛縱東西初無定適而俊逸之氣自為人所畏王之文如月墮澄江上下一色淨絕垢氛而清明之氣可掬也寧海縣志修德名琦以字行

余尚則

黃巖縣志名郁以字行博覽羣籍尤長於春秋洪武九年以選貢授河東鹽運副使奏正

鹽法忤旨謫岳州經歷與方孝孺林公輔輩為友以文學名當世其詩酷類晉唐有蛙吟集

年完

舊浙江通志字元亮黃巖人博學能文章洪武九年廷試首選擢吏部驗封主事一時名士方

孝孺郭濬咸稱其文理可望以董賈韓柳尋簡耆儒輔導親藩改燕府紀善仁宗為世子實受業焉所著有四禮家儀

張建壁

臨海縣志名穀以字行工草書善詩文洪武中舉賢良方正授仙居訓導方正學論其詩

刻隋新秀調信奇矣欲其知所趨向由大路而不失馳驅之正焉所著有張古學文集古學其號云

鮑仁濟

台州府志字原弘黃巖人嘗從陳鏗翁遊鏗翁之學益考亭支流也為文精密雄健一主

於理洪武間薦授樂清訓導永樂初授伊府紀善進治國要道十二章數以直言忤王王不悅將中

以危法仁濟先自歸京師王旋敗得免所著有恕菴集

應宗祥

列朝詩集傳字尚履黃巖人少好學讀書達旦懸髻屏牀以自警為諸生未久即棄去構

書屋於澧川之上詩文好古不自貶以趨世弟子私誼曰文貞

余吉祥

黃巖縣志字大昌洪武中選貢永樂初用薦起臨海婺源訓導兩應聘主福建文衡擢禮

部主事為詩文意遠詞麗周文襄忱陳
祭酒敬宗咸稱其博雅有退菴集行世

童一鶚

赤城新志字伯昂黃巖人性淳厚穎悟絕人
年十五善屬文嘗作運甕大椿等賦鴻生碩

儒靡不數賞有
無謂稿傳世

章取

台州府志字仲寅黃巖人領鄉薦試春官俱第
二歷武庫主事武庫主百司僚從或得其奇贏

以自潤取獨斂退羸馬陋室如曩昔遇古今書會
意處輒手錄之退為其從遊者剖析無倦累典鄉
會文衡稱得士景泰己亥命同修宋元史
續朱子綱目卒所著有詩經提要詩文集

袁昂

天台縣志號知止博學工詩喜讀周易參同契
與杜司馬為莫逆交每戲曰袁書厨卒年九十

著有知止
集五卷

陳嵩

寧海縣志字伯高年十五邑令辟為胥吏不從求為邑庠生令考經義三篇又俾賦詩有平生

縱有長楊賦也待吹噓送上天之句令加嘆賞永樂中以太學生特詔充纂修所著有春秋集義春

秋名

張由益

黃巖縣志名進以字行篤學好古嘗曰文以五經先秦為準詩以唐人為準性理以宋儒

為準庶罔謬戾所著有淑西集同時蔡旰號俟軒童琇號琴室俱有隱德能詩旰著風瓢遺響琇著

懷癡子集

陳大昇

黃巖縣志善詩時周令旭鑑以猛治邑一日忽召大昇家人震讟莫知其由已至則命題

西湖清景圖大昇為題長句頃刻而就令大嘆服

王一寧

分省人物考仙居人英敏過於常兒年十三能詩仁宗在春宮聞之召試早過銀河詩立

奏中永樂癸未會試尋丁父憂家居十年會宣宗求文士甚切吏部以應召見試表正萬邦論及詩賦皆見嘉賞擢吏部主事改翰林修撰預修宣廟實錄充進講官主考應天鄉試歷遷禮部左侍郎卒贈太子太保諡文通一寧為人閎敏疏達為文必根於理詩詞翰墨清絕可愛

孫元肅

黃巖縣志名允惇以字行經明行修舉為海門縣訓導公暇吟咏性情獨立於萬象之表

陞靜江王府長史著有梅花百咏

謝績

太平縣志字世懋讀書務窮底蘊貫徹為經實際為緯才高數奇避世無悶以詩自娛卒於家

文肅公鐸輯其遺稿曰王城山人集山人之詩始規倣盛唐極婉轉流麗之妙晚獨愛杜少陵則盡

變其故格益為清激悲壯顧其叙事引典雖往復開合未嘗不出於正可以知其為人矣李東陽陳

憲章為

之序

應璚

仙居縣志號琴窗王一寧外孫幼携之遊長安一寧應制賦神京八景上稱善璚次其韻語尤

奇麗一寧奏呈其詩上大奇之曰斯真王學士甥乎命送中書肄業長遂放浪詩酒不營仕進有琴

窗集

句

徐慶亨

黃巖縣志字世嘉弘治己丑進士善屬文尤工詩嘗在京師與諸公詠雪有一鳥不鳴樹

千峯半入雲之句人遂稱徐千峯學東陽見其白雁賦尤加歎賞歷禮部主事卒所著有西浦存稿

公餘錄

管邦宰

黃巖縣志字良卿以詩文著嘗賦金山夏相國言亟加數賞尤工真草書領正德癸酉鄉

薦未官卒著有二洞小稿

王佐

列朝詩集傳字仁甫臨海人號古直老人善草書作詩旅遊京師客公卿間三十年不置金甌

無僮僕意度率直不為崖岸遇所會意處欣然忘去李東陽作王古直傳

潘淵

天台縣志字默之由明經仕馬平知縣工吟咏嘗進嘉靖龍飛頌為璇璣回文詩數百首所著

有玉屑吟雙澗集

蔡宗堯

列朝詩集傳臨海人嘉靖丁酉舉人司教松溪諸生刻其文曰龜陵集多識古文奇字詰

曲取裁亦圭峯之流亞出於嘉靖中年知其蔑視李王矣集二十卷詩止樂府一卷

秦鳴雷

臨海縣志字子豫嘉靖甲辰進士廷對世宗親擢第一時方祈雨郊壇觀其名復大喜授

修撰陞左諭德歷國子監祭酒禮部右侍郎乙丑主會試時長陵神道橋圯巨璫請改建估費十萬餘金為自潤地閣臣以經始事屬禮曹鳴雷率衆度基而潛授意於擇日臺官報曰不利興造須二三年乃可舉事遂寢改吏部左侍郎兼學士教習庶吉士隆慶辛未陞南吏部尚書乞休家居二十餘年凡吳越名勝無不探討卒年七十六所著有倚雲樓稿及談資

蔡榮名

台州府志字去疾黃巖人少負異才雅以古文詞自許王世貞見而奇之延之上座酒酣

失足池中碎玉杯命作玉杯賦刺燭而就有太極圖注芙蓉亭稿行於世

石文睿

寧海縣志字文思萬厯庚辰進士引病歸杜門著書授南太常博士復乞養家居日事撰

述竟以疾不起所
著有白山文集

葉良佩

傳詳
循吏

陳公綸

臨海縣志字渙中善為五言律詩清新婉至
著有采碧集其自序以為本東野農夫因徙

郡城誦讀章縫行迹不出其鄉獨六客錢塘平生
好詩歌恥趨謁自禁詖語以玉室名其詩不欲著

姓字
云

王薰

黃巖縣志字簡之年十五作滕王閣賦為邵二
泉王希文諸公所稱許補縣學生為詩文清逸

典雅年三十卒人惜之所著有醒心集青林存稿
時有張神童蘆者八齡能詩謝文肅嘗以楮箋命
題操筆立就云流水往來急青山遠近齊
相期恐相失冒雨過橋西文肅大奇之

陳錫

臨海縣志字元之宏通該博嘉靖己酉薦於鄉
卒業成均司成以五經疑義課考決微訂奧司

成歎服丙辰成進士授禮部祠祭司主事會日食
時陰雲莫辨相嵩方以當食不食奏稱賀錫從實
報所食分數嵩怒因考察罷歸益壯門著書嘗作
易原辨陰陽象數之旨證以古今事變識者謂遠
過焦氏易林善賦詩即席分韻數
百言刺燭而成晚年著有楮瘞集

施勳

黃巖縣志字定之由貢授武平知縣卒官為詩
文對客揮毫詞采蔚然又精真草書著有楮頤

稿北遊稿

靈感錄

吳俸

黃巖縣志字廉夫幼以文學著聲嘉靖初潘御
史景招萃兩浙名士於萬松書院試青山綠樹

論奇之超貢上京以教授奉命修玉牒進
紀善歸以吟咏老於家有叢桂山堂類稿

張應魁

黃巖縣志字星衡由明經授餘姚訓導遷諭寧化署邑策力救諸生危案有崇德生祠所

著寧陽圖說日蝕測影
漆室末議大有山詩集

王士性

臨海縣志字恒叔慕向子平為人作為詩文幽深峻削孤情獨往萬厯丁丑成進士知確

山縣擢禮科給事中典試四川陞大理少卿晉右僉都御史巡撫河南力辭遂改南鴻臚寺正卿士性意氣凌厲以官為寄九州履其八所未至者獨閩耳諸名山自五岳外窮幽極險凡一巖一洞一草一木無不精訂他若堪輿所述象胥所隸千名百種無不羅致筆札間有五岳遊記十二卷廣游

志二卷廣
志繹六卷

徐光允

天台縣志字長卿九歲從祖於潮州能舉括韓文公廟碑為五言詩年十五補弟子員以

歲薦老所至輒留題有山齋筆
乘墨餘狂言醉蝶齊藝語諸書

馮繩祖

臨海縣志字武甫性慷慨不善謀生顧篤好
詩文兼工米南宮書法晚不得志縱酒長歌

雖雙烟屢斷不之顧所著有窺園草蛙
鳴琴山雜咏母陳氏亦有繡佛齋草

戴杏芳

臨海縣志字岷人後改名枸通達古史百家
言鑽幽嗜異為文輪囷離奇尺牘寸素人爭

相藏弄當事者徵文走筆應之不往見見
亦不干澤以是落落終其身有儼草諸集

國朝

洪若臯

台州府志字叔叙臨海人順治乙未進士除
戶部主事歷郎中出為福寧道僉事連丁內

外艱遂不出酷嗜學至耄手不停披林居三十載
日以鉛槧為事凡生平未見之經濟一寓於著述

讀者咸知為有用之文其板行者南沙文集文選
越裁臨海縣志論定未梓者有明文瓊液樂府源

流詩韻四書

彙譜等書

何衡

臨海縣志字無頗幼補弟子員工文詞嘗賦白
燕詩數十首紙為之貴隨父舜齡歷任山左閩

中益得江山之助同人社集擁為雞壇祭酒火
相尋數椽悉付灰燼僦居城北山房與二三故舊
徜徉山水詩酒間所著有憶焚草

客遊集鰲江雜著追昔篇等稿

陳臣謙

舊浙江通志字六吉臨海人為諸生有文名
受知學使黎元寬明崇禎間以明經應北闈

未舉返棹過姑蘇傾所携金市書籍以歸鍵戶山
房盡棄舉子業作為詩歌鏗鏘鏗鏘不忝家風

陳璜

臨海縣志字元卿為人軒軒磊落以能詩稱登
順治壬辰進士授壽張知縣縣僻而簡署中藝

承疏以自給日手一編吟咏不輟以小誤降補寧
德丞卒於閩著有寓園詩集文畧旅書琪樹園詩
話

金華府

唐

駱賓王

唐書王勃傳賓王婺州義烏人七歲能賦詩
初為道王府屬歷長安主簿武后時數上疏

言事下除臨海丞執鞅不得志棄官去徐敬業亂
署賓王為府屬傳檄天下斥武后罪后讀至一杯
之土未乾六尺之孤安在矍然曰誰為之或以賓
王對后曰宰相安得失此人敬業敗賓王亡命中
宗時詔求其
文得數百篇

舒元興

唐書本傳婺州東陽人始學即警悟元和中進士高第裴度表掌興元書記文徽豪健一

時推許拜監察御史遷刑部員外郎元興自負才高有過人者太和五年獻文閣下不得報上書自言改著作郎分司東都及李訓用事遷御史中丞兼刑部侍郎以本官同平章事甘露之變遇害元興為牡丹賦一篇時稱其工後帝觀牡丹凭殿闌誦賦為泣下

馮涓

東陽縣志宿孫也大中四年進士文譽甚高新羅方建層樓齋金帛奏請撰記時人榮之厯官

眉州刺史時王氏阻兵強索之署中不屈兼以恃才傲物幾為所危然憐其文藝每容之後朱梁遣使致書命諸從事具復皆不愜涓援筆立就大稱意

五代

劉昭禹

金華先民傳字休明金華人刻苦攻詩有云句向夜深得心從天外歸仕湖南為天策府

學士入南唐為嚴州刺史
有詩集一卷凡三百篇

宋

徐無黨

兩浙名賢錄永康人從歐陽修學古文詞修嘗稱其文日進如水涌山出嘗注五代史妙

得良史筆意皇祐中以南省第一人登進士第仕止郡教授而卒

曹冠

金華先民傳字宗臣東陽人博聞強記以文詞知名於時紹興甲戌進士第二擢太常博士後

知郴州轉朝散大夫卒著有經進雜論萬言書恢復秘畧時政掾弊裕民政要忠言帝範十贊及雙溪集二十卷廬陵楊萬里見其集甚為推服

范端臣

金華先民傳字元卿蘭溪人浚之從子紹興中進士官至中書舍人雖入官未嘗廢學文

詞典雅尤工於詩有集三卷出入諸家卓然名世至篆楷草隸亦造其妙學者稱爲蒙齋先生

喻良弼

兩浙名賢錄字季直義烏人與兄良能字叔奇俱以古文詞有聲太學良能成進士而良

弼僅以特科尉新喻有杉堂集十卷樂府五卷龍川陳亮曰叔奇爲文精深簡雅讀之愈久而意若新季直文蔚茂馳騁蓋將包羅衆體而一字不苟讀之亶亶無厭也尤工於詩一時鉅公若洪邁楊萬里皆與爲文字友

何恪

金華先民傳字茂恭義烏人好古藏書至萬餘卷工於文陳亮嘗稱其奇壯精緻反覆開闔卒

能自開其意登紹興三十年進士詣闕上萬言書及恢復十二策與朝論不合歸所著有南湖集

陳炳

金華先民傳字德先義烏人好古文務為奇語與喻良能良弼何恪號烏傷四子乾道二年登

進士第為太平縣主簿所著有易解進卷巖堂雜稿

倪朴

浦陽人物記字文卿浦江人豪雋不羈喜舞劍談兵恥為無用之學紹興間草書數千言歷陳

征討大計且以山川險阻戶口多寡用兵者所當知乃徧考羣書成輿地會元志四十卷晚知不用復著監轍錄五卷倦倦猶前志也好使氣與人多不合獨永康陳亮敬之淳熙中以豪俠徙家筠州會赦歸朴之友吳克己字復之縣之鴈塘人窮經博古尤邃於易旁通釋氏書多有著述朴嘗評其文汪洋恢怪如崩崖翻浪使人驚畏又翫之而不忍去

陳亮

宋史本傳字同甫婺州永康人才氣超邁喜談兵下筆數千言立就嘗著酌古論郡守周葵奇

之隆興初婺州以解頭薦上中興五論不報益力
學著書者十年淳熙五年更名同詣闕上書孝宗
赫然震動欲用种放故事擢用之曾觀知之將見
亮亮踰垣而逃待命十日渡江歸日落魄醉酒戲
為大言涉犯上刑部侍郎何澹以聞下大理答掠
誣服為不軌孝宗廉知其事奏入劄其牘於地亮
遂得免亡何亮家僮殺人臺官論亮情重王淮辛
棄疾羅點援之力復得不死亮自以豪俠屢遭大
獄感孝宗之知至金陵視形勢上疏激孝宗恢復
而是時將內禪不報由是在廷交怒以為狂怪會
呂興何念四毆呂天濟且死恨曰陳上舍使殺我
取入大理衆意必死少鄉鄭汝諧閱其單詞曰此
天下奇才也力言於光宗免之未幾策進士光宗
得亮策御筆擢第一既知為亮則大喜曰朕擢果
不謬授僉書建康府判官廳公事未至官一夕卒
亮志存經濟人人見其肺肝薦士恐弗及家僅中

產畸人寒士衣食之久不衰卒之後葉
適請於朝命補一子官端平初諡文毅

徐次鐸

金華先民傳字文伯東陽人紹熙元年進士
又試宏詞科為山陰尉著復鑑湖議為樞屬

以西府典故散在方冊自建炎以來攻守之具編
纂成書名曰中興兵防事類官止三衢倅嘗倣古
周禮作漢官又作唐書傳注補注音訓總三百卷
自號徐氏唐書又以唐書糾繆訛舛作釋糾辨謬
卷十

胡濊

東陽縣志字景雲耽嗜六經子史學問深邃而
行文典雅長於詩賦尤善表啓著滄鳴集八憤

詩等

喻品

宋濂喻儒傳字伯經義烏人慶元己未進士歷
僉書鎮南軍節度判官尋請祠歸築室夫人峯

下曰蘆隱性豪談論今古輒目光如炬氣軒軒出
鼻吻間尤長於文詞當乾道淳熙間朱熹呂祖謙
陸九淵張栻皆談性命而開功利學者各守其師
說陳亮倔起獨以為性命之微子貢不得而聞後
生小子與之談不置殆多乎哉禹無功何以成六
府乾無利無以具四德如之何可廢也於是推尋
聖賢經理世故之大畧明白簡大坦然易行人多
疑其說而未信侶獨出為諸生倡扶持而左右之
已而亮再下詔獄侶與同志極力營解遂脫亮於
萬死一生之中人多義之所著有隨見類錄二百
稿蘆隱類
卷五十卷

方勺

萬歷金華府志字仁聲金華人後居湖州西溪
號泊宅翁潘良貴稱其超然遐舉神情散朗如

晉宋間高士其詩文雄深雅健
追古作者所著有泊宅編十卷

夏明誠

金華先民傳字敬仲金華人其學本於呂東萊而自負甚高登慶元丙辰進士第三為安

慶節推遂致仕嘗作八咏樓賦序直斥沈約為是樓之辱柳貫稱其鉅作傑製在天地間如福物異

瑞要不可多見而屢得之也

時少章

嘉靖金華縣志字天彝寶祐癸丑進士由南康軍教授擢史館檢閱授保寧軍節度掌書

記卒自負甚高談經自出新意史學最精平生所著有易詩書論孟大義六十餘卷論孟詩贊說易卦贊雜文古歌詩總曰所性稿五十卷鄭士懿稱其新雋峭拔自成一家吳師道亦云

方鳳

浦陽人物記一名景山字韶父其先自睦來遷浦陽鳳有異才嘗遊杭都將作監丞方洪奇其

文以族子任試不中第後以特恩授容州文學未幾宋亡自是為汗漫游北出金陵京口南過東甌

海上顧盼徘徊一發於詠歌深於古今之感臨沒猶屬其子題銘曰容州示不忘也所著詩三千餘篇曰存雅堂稿子樗字壽父亦工於詩

元

傅野 陳堯道

金華先民傅野字景文堯道字景傳皆義烏人黃潛輯其詩為鱗川二妙

集而序之以為景文之詩精切整暇如清江漫流一碧萬頃而魚龍光怪隱見不常景傳之詩涵肆彬蔚若奇葩珍卉洪纖高下雜植名園終日玩之不厭也

張樞

元史杜本傳張樞子長者娶之金華人幼聰慧外家潘氏蓄書數萬卷樞盡取讀之既長肆筆

成章有問以古今沿革政治得失宇宙之分合禮樂之廢興以至帝號官名歲月先後厯厯如指諸

掌其為文務推明經史以扶翼教道尤長於紀事
嘗取三國時事撰漢末紀傳附以魏吳載記為續
後漢書七十三卷朝廷取其書置宣文閣又春秋
三傳歸一義三卷刊定三國志六十五卷林下竊
議曲江張公譜
敵彙編各一卷

于石

傳詳
隱逸

李裕

元詩選傳字公饒東陽人嘗從許謙遊至治間
詣闕上聖德頌補國子生至順元年舉進士歷

道州推官所著有中行齋稿詩篇
秀麗尤工七言樂府出入二李間

金似孫

萬歷金華府志字叔肖雋敏強記工舉子業
文科既廢遂一意於詩清新警拔善諷切人

吳師道稱其觸事感時
足以附於風人之列云

戴良

金華先民傳字叔能浦江人初業舉子尋棄去專為古學時柳貫黃潛吳萊以文章鳴於浙東

良往來諸公門下盡得其間與余闕持節過婺開良善詩與論古今作者詞旨優劣閱乃盡授以平生所得於師友者於是良之詩名遂雄東南至正丁丑以薦擢江北儒學提舉度無可行其志棄去益肆力於詩文瑰奇磊落清新雅潔往往無愧於作者有九靈山房集三十卷和陶一卷春秋經傳三十卷

胡助

萬厯金華府志字履信一字古愚東陽人曾祖居仁從呂祖謙學助刻志問學悉究經史百氏

大旨舉茂才授建康路儒學錄吳澄見其詩文大加稱賞用薦改翰林國史院編修官助狀貌清古平生誠實無偽見人有善亟稱之嘗作大拙小拙傳以寓意所著有純白類稿三十卷

葉顥

元詩選傳字景南金華人元季結廬城山之隅幅巾野服輕屨瘦策時從樵夫芻叟往還自序

所作詩以為薪桂老而雲山高寒音調古而巖谷絕響故名之曰熱雲獨唱

吳景奎

金華先民傳字文可蘭溪人酷好為詩嘗遊山澤間方苦吟而雨至雨濡具衣弗知也所

著集曰葯房樵唱宋濂為之序

明

宋濂

浦陽人物補遺字仲衡濂之次子博雅善詩文尤精書法與宋克諸人齊名洪武中以薦為中

書舍人一日帝出元內庫蟠桃核半片大可盈掌命濂記使濂書之稱為雙絕方孝孺稱濂書為威鳳冲霄祥雲捧日濂亦嘗謂二兒結篆鐵作文所著有水簾洞玉兔泉諸詩集子懌力學復工書

蘇伯衡

金華先民傳字平仲金華人少習舉子業中年專肆力於古文遂以知名明初召為國子

學正舉入史館纂修元史書成授國史院編修以疾辭賜楮幣文綺遣還久之復起為處州教授以其精博而不粗澀敷腴而不苛縟劉基稱其語粹而詞達識不凡而意不詭人皆以為確論

張孟兼

金華先民傳浦江人以文詞知名性耿亮不阿每良朋盍簪抵掌笑談胸中森然芒角必

盡吐乃已洪武初薦入史館與修元史書成授國子學錄累官山東按察副使與布政爭論中以危法沒於京師所著有白石山房稿若干卷初太祖與劉基論當時能文之士基首推宋濂其次自謂不敢多讓其次則推孟兼謂其文甚俊而意氣畢然云

吳沉

萬厯金華府志字濬冲蘭溪人師道之子與兄

轉國子博士以文學被寵眷官至東閣大學士禮

遇亞於宋濂後以讒死嘗撰千家姓進御及所著

有應酬稿殺
川集等書

楊弼

金華先民傳字仲章義烏人徙居東陽早從陳

初膺薦上京以疾辭歸著有百一稿無逸齋稿
輯元詩為正聲類編總若干卷自號竊巖先生

傅藻

萬厯義烏縣志字伯長受業黃潛以文章知名
由本縣儒學名授翰林編修尋拜監察御史官

至河南廉使藻為御史時奉勅按鳳陽獄道途往
還成紀行詩若干卷率有關於風教一日名對以

詩進呈帝大悅作
和章四首賜之

王紳

金華先民傳字仲縉義烏人諱仲子也諱死節時紳年十三落筆為文不可禦未幾母兄相繼

沒焚焚憂患中而際然負奇志盡取經史百家言出入上下務擷其精奧乃已宋濂一見奇之曰王子充為不死矣紳痛父遺路未返首邱躬趨雲南求不獲乃即死所設奠慟哭招魂而返述滇南慟哭記以著志徵授國子博士卒所著有繼志集三十卷其文豐蔚雅贍稱其家法詩冲淡有陶韋風子孫字叔豐亦以文詞名有青巖集

鄭棠

鄭柏

金華先民傳棠字叔美浦江人與弟柏俱受業宋濂之門以文詞知名棠尤善

馳騁永樂初與纂修大典除翰林院典籍陞檢討以疾辭歸所著金史評元史評及道山集二十卷柏字叔端隱居著書或以其名達之蜀王王曰可謂清逸之士人因以清逸處士稱之著有聖朝文

纂文章正原續文章正宗
金華賢達傳進德齋稿

劉剛義烏縣志字養浩博學能文詞遊京師學文於宋濂嘗製饒歌鼓吹曲十有二篇金華胡翰評

其篇次體製皆承柳子厚之舊而才氣橫發音節鏗錡則得之宋潛溪居多蘇伯衡謂其才雄氣暢

詞與事稱有
古作者之風

沈賓國

兩浙名賢錄字用之義烏人性英特博閱經史弱冠即厭舉業攻古詩文嘗遊越謝文正

遷一見之喜曰今之長吉也為詩多奇思不肯作尋常語所著有五經注疏太極圖衍皇極經世書

疏文集

若干卷

盧格

靜志居詩話字正夫東陽人成化辛丑進士除貴溪知縣擢江西道御史格難經伉伉所撰荷

亭辨論八卷戴山
劉宗周為作序

應廷育

金華府志字仁卿永康人嘉靖癸未進士時
值爭大禮廷育據濮議忤旨因乞養親改南

刑部左遷知州尋備兵入閩致仕講學論道類多
格言著金華先民傳編永康邑志又有刑部志讀

律中庸本

義等書

胡應麟

弇州史料字元瑞蘭溪人自號少室山人父
副使僖元瑞九齡時從里社師習經生業而

心厭之恣肱副使篋得諸書讀之遂能為歌詩已
得薦鄉書然意不在一第先後購經史子集四萬
餘卷手抄集錄凡十之三築室曰二酉山房旦夕
坐卧其間所著有詩八十卷文四十卷詩藪十八

卷筆叢四十
八卷行於世

張一韶

浦陽人物補遺字尚成髫年補博士弟子貢入成均癖嗜書自禮樂刑賦旁及方輿氏族

星歷醫卜無不精究因慨然以著作自負攻古文詞縱遊三輔名都盛宗閥里匡廬九疑洞庭彭蠡嶺外盡交諸名士自是文益雄邁尤長於詩歌作咏史二百篇援引駁據率自成一家言又著歷代詩章辨體樂府考題晚善病然不廢吟咏有病餘集又著詒燕堂集三十卷

張元銘

浦陽人物補遺字演中精三易六樂曰樂易無異同損八十一之一分益三十二之三分

陰陽變易六律旋宮盡此矣著樂則六卷以聘抵京與大理張懋學太常于正發高攀龍何棟如諸公論樂於神樂觀著原樂大成復請講易於天玉書院著原易編過樵李樞部岳元聲出震南兌北圖據易先後天變化之次力辯其非岳屈服焉歸老著三皇五紀以明律度及地理連山醫墳欵要

諸書
行世

金江

義烏縣志字孔殷博通羣籍以著述為事由太學兩佐州治職務修舉未嘗以吏事妨學所著

有續綱目書法續敬鄉錄端本要畧華川文派錄義烏人物志太倉高唐二州志總八十卷

吳存中

婺書字致之生而姣好通敏異常見為文清壯有法好言古人中陸機王維喜法書著書

論一卷字學十卷充任子入南雍時禮部侍郎葉向高攝雍事存中手經義及詩古文上詔向高讀未竟攝衣起以賓主禮見作萬厯紀元三大征頌一篇傳誦於時李維楨見之歎曰老夫不逮也

龔士驤

婺書字季良義烏人慷慨有志節十四補博士弟子能為古文詞折節讀書造詣諸賢豪

長者不避風雨凡星氣握奇博射暨形家軒岐諸方伎一見即能習試而絕出者莫如詩遺編數卷

精苦沉細在唐人諸家中不多見也又作續文賦以明文章之源與近世之陋天啓辛酉舉於鄉崇禎戊辰成進士授溧水令卒

吳之器

義烏縣志字賜如年十一出就童子試冠其羣為諸生家有藏書十餘椋坐卧其間垂十

年與斯一緒龔士驥輩六七人為八詠樓社崇禎壬午試南闈中式挾策遊二京慨然有匡世志所著發書及發書別錄明月齋稿明月齋後刻稿

衢州府

唐

徐安貞

舊唐書本傳信安龍邱人善五言詩嘗應制舉一歲三擢甲科開元中為中書舍人集賢

院學士上每屬文作手詔多
命安貞視草累遷中書侍郎

徐珏

舊浙江通志江山人五歲暗誦周易小戴禮大
中十三年父舉明經携珏詣闕名試思政殿賜

衣絹明年童子科及第父
亦策名號所居坊曰雅儒

宋

徐泌

弘治衢州府志字道深其先汴人官於衢因家
焉泌登第終起居舍人知制誥有文集藏史館

子庸直集賢院嘗
表上周易意學蘊

蔡望

衢州府志西安人咸平間進士注陰符經命翰
林學士宋白看詳白奏此書當秘授中藏主簿

慎從吉

宋史本傳字慶之知禮之子錢俶壻也自歸
朝居散秩幾三十年頗以文酒自娛士大夫

多與之遊大中祥符間判吏部銓臨事敏速所至
務暇察多請對陳事上謂其無隱權知開封府請
屬一無所受天禧四年生與寇準善
以光祿卿致仕從吉善為詩有警語

江鉞

開化縣志字執中性剛而行高與人交有氣誼
以進士知上元縣遷尚書郎棄官奉親放意泉

石間與趙抃遊所著有金
川集抃稱為劉白遺風

毛維瞻

兩浙名賢錄西安人以詩名與趙抃同里相
得為山林之樂元豐中出知筠州政平訟理

民歡樂之時蘇轍謫監筠州酒稅相與倡
和有鳳山八詠山房即事詩傳誦藝林

毛滂

衢州府志字澤民江山人元祐中為杭州法曹
東坡為守滂秩滿去會有歌贈別小詞東坡問

誰作以毛法曹對坡語客曰郡僚有詞人而不及
知某之罪也翼日折簡追還留連數月滂因此得

名官至祠部員外郎
知秀州有東堂集

劉鼎

龍游縣志學問宏博議論浩瀚一時學者皆從之同郡趙抃見其文嘆曰君當抗行韓柳非科

目之文也子贊
亦以文學名

江褒

弘治衢州府志字仲嘉開化人登進士第性高簡娶曾布女布為相壻皆官中都惟褒調餘杭

尉後終餘杭宰善楷書自謂鍾王虞褚以來皆傳一法非取其形似也篆隸俱入能品有遺稿五卷謹按萬厯常山縣志載縣人江褒亦曾布壻姓同而褒褒字仲嘉相似音亦相近或疑為一人但褒字仲長褒字仲嘉各因其名以起義開常異籍而一為太學生一為餘杭尉事蹟亦各不同顯屬兩人今列褒傳於孝友
拈出以俟博考

程天民

弘治衢州府志開化人幼即日誦數千言屬文操筆立就熙寧中進士官至太學博士

程俱

宋史本傳字致道開化人以恩補吳江簿近臣以謨述薦遷著作佐郎宣和二年進頌賜上舍

出身歷知秀州紹興初始置秘書省以為少監奏脩日歷秘書長貳得預修纂自俱始時庶事草創百司文書例從省記俱撫拾三館舊聞比次為書名曰麟臺故事上之擢中書舍人兼侍講後罷為提舉江州太平觀久之除徽猷閣待制秦檜薦俱領史事力辭不至卒俱在掖垣命令下有不安於心者必反覆言之不少畏避為文典雅閎奧為世所稱

毛晃

弘治衢州府志字明叔江山人紹興中免解進士嘗閉門著書畱意字學增注禮部監韻行於

世學者稱為鐵研先生子居正亦第進士有名於時

江漢

弘治衢州府志字朝宗常山人博學能文尤長歌行倅密州時秦檜為郡博士掌牋表漢每指

摘竄定後至行在高宗欲用之適檜為相以祠祿遣歸

張恪

張恢

江山縣志恪字季武弟恢字季長皆舉進士以文學知名恪終著作郎恢嘗作

士學聖人之極致賦乾道間入對便殿孝宗曰朕在潛邸已誦卿賦因除太學正

徐猷

徐曉

龍游縣志猷字仲山少以文章名與梁溪尤袤善袤特稱之登進士第著紹興

聖政寶鑑十卷以進上嘉之弟曉字次山以進士歷國子監博士學富才瞻尤長於詩有竹溪集

張道洽

弘治衢州府志字澤民開化人端平二年進士真西山所取士老始為池州僉判詠梅花

詩三百首方萬里稱其篇篇有味雖古人已言之意而縱橫口手皆脫灑清楚有詩集行世

柴蒙亨

兩浙名賢錄江山人甫能言即口授書十萬餘言不忘六歲暗誦九經通春秋大旨郡將

面試童科作文者三以神童聞得免解端平二年初赴省嘗從幸六和寺上指示璿云一璿七層八面萬佛千燈蒙亨即應聲曰孤舟雙槳片帆五湖四海大嘉之有詩集若干卷

徐復殷

弘治衢州府志字元禮江山人甲科召試玉堂由秘書郎歷遷左庶子言不合遽退學

易宋理宗賜客齋二字竊山魏了翁稱其文西澗葉夢鼎嘉其行東澗湯漢銘其墓

張汝勤

弘治衢州府志字賢甫開化人祖檀山父竹巖皆以文名至汝勤詩文尤工入元食貧不

仕所著有詩集六卷講義史評古賦十卷擬漢唐制詔誥表雜文若干卷

元

鄭介夫

弘治衢州府志字以居開化人著韻海至大間上太平策一綱二十目頗行之仕終金谿

縣丞

張宗元

弘治衢州府志字仲亨開化人至順初進士高古博雅罕與俗交以文詞名仕為秘書少

監至正間部使者余闕行縣為立興賢坊以旌之

程斗

弘治衢州府志字仲元開化人世居龍山號龍麓子受業三江先生之門傳性理之學尤長於

詩文有龍麓子集若程惟善戴彥則皆出其門

明

祝宗善

兩浙名賢錄江山人博學能詩洪武間舉為邑教諭秩滿之京館雖鳴僧舍客有微服倚

闡吟者韻未竟宗善長揖續之客問其名而去翼
日傳手詔召見擢知蘇州府始知微服倚闌者太
祖也宗善守廉介以詩文擅名後坐誣
籍其家惟圖籍數卷而已仍復其官

方沃

天啟衢州府志字化輔開化人風度灑落該覽
古今詩宗唐人文尤典贍追古作者有素軒詩

文集

金弘訓

天啟衢州府志字公懋開化人為人捐介奇
萬甘貧力學試不遇遂棄舉子業為詩文豪

邁俠宕人莫能及作史論數十
篇皆出人意表有復菴集行世

胡榮

弘治衢州府志字希華龍游人嗜學有文行從
金華汪公若講學得其旨歸當道交薦不起著

有穀溪

漁唱

徐履誠

弘治衢州府志號迂叟龍游人精春秋為學者宗師有司屢以明經薦不赴有城南集

吾慶

衢州府志字善有開化人舉博學為本縣訓導陞東莞教諭淳古博洽文不屬藁所在稱為吾

子夫

徐以昭

弘治衢州府志字用晦龍游人讀書談道不求仕進所作文必有裨名教有風月交談集

方瑛

天啟衢州府志字廷蘊開化人進士官行人司正廉介有文仕未一歲乞歸蕭然四壁人稱箸

溪先生有雞肋集

汪圻

弘治開化縣志字彥達開化人隱居不仕長於五言古選人號為汪短選

吾謹

舊浙江通志字惟可開化人正德丁丑進士總角能吟詩博綜經傳子史天文地理兵家陰陽

釋道等書過目不忘李夢陽奇之曰今之李賀也志輕軒冕得第後歸隱少華山與何仲默孫太初

李崆峒
相頡頏

徐沆

天啟衢州府志字清之西安人嘉靖庚子鄉薦知裕州改巴州歸嗜讀書不問塵事淹貫子史

博極羣書督學華亭徐階目之曰書厨計偕邸中每夜背誦史書十數卷不漏一字鄰友疑其燈下披閱穴窗窺之漆如也始大駭服歷兩州愛民如子家仍四壁立居林下三十載壽九十一卒

鄭孔庠

天啟衢州府志號樾溪西安人穎敏絕世每過市賈書林輒取其書甲乙之業已默記仍

與客談而記不輟年十六遊武林盡和梅花詩名輩聞人士讌集約歌早朝詩以勸觴他客或記

一二孔庠偏代席中人歌之衆謝不及也詩多不留草弟子識其什之一名樾溪集

徐惟輯

衢州府志號紫崖江山人博學能文少時詠回文詩知名嘉靖乙未進士為內閣中書舍

人相國徐階應詔製青詞命惟輯代為之上未嘗不稱善有詩集行於世

余湘

天啓衢州府志字毓靈龍游人以貢授臨武知縣性疎曠不慕聲華為文飛揚跋扈薄時藝好

為古文詞尤長於詩詠諧排調個儻不羈受業於鄒守益遂窺性命之微治臨武有仁聲

余敷中

衢州府志字定陽西安人少勤學沉酣子史工古文詞詩賦輯春秋五傳名曰麟寶以鄉

薦秉鐸淳安與諸生開析理奧所著有太末先生集南園北游青溪諸詩

柴惟道

天啓衢州府志字允中江山人縞服臞形皚然不滓獨好為詩其詩清潔飄灑置之唐人

中未可辨刊落世事卓然高操天台友人王宗沐為作翫梅亭稿序

徐應秋

西安縣志字君義可求次子萬歷丙辰進士有書癖充棟之藏漁獵殆盡釋褐兩令劇邑

皆有惠政擢儀部郎為魏忠賢所銜削奪歸里延里中時彥結社於足園授餐角藝手為丹黃戶外

事泊如也著書甚富其已行世者談薈雪純塵餘古文藻海古文奇艷駢字憑霄等集

余鈺

衢州府志字式如西安人方伯四泉之孫天資卓犖藏書萬卷皆丹黃數過終日下帷不與外

事試輒冠倫古文詩歌沈鬱華贍手輯純師集陳臥子吳幼洪為弁其首以貢齋志終

葉國章

西安縣志字含美三衢文習至國章而洗剔殆盡時文古文詞皆然其詩鏡刻新異有青

藤道人之風以鍵戶恥問生計落其產潦倒而卒

國朝

徐國珩

舊浙江通志字鳴玉西安人尚氣節敦行誼讀書上下千古為文與行雄肆尤好獎厲後

進衢州府志國珩晚年優游泉石好著述有隱史八卷及書畫軒東珂偶錄北行草行於世

余恂

舊浙江通志字孺子龍游人太僕卿日新仲子順治辛卯領解額壬辰成進士改庶常授翰林

院檢討

一歲三遷游歷左春坊左諭德丁酉典試

八閩試

竣過里門會丁內外艱服闋以疾乞休林

居二十年

年郡邑利弊悉心講求而自奉不異

寒素卒

之日邑人士與四方知交無不隕涕

浙江通志卷一百八十一